




2045



皇
明
文
衡

七

Inches 1 2 3 4 5 6 7 8



Centimetres 1 2 3 4 5 6 7 8 9 10 11 12 13 14 15 16 17 18 19


Blue Cyan Green Yellow Red Magenta White 3/Color Black

TIPPEN Color Control Patches

© The Tiffen Company, 2007







皇明文衡卷之二十七

書

與貝川先生書

洪武三十二年三月朔州作

解縉

縉薰沐拜書貝川大人先生閣下遺遠誨言存將十稔天涯
闊異感念奚云縉率易狂愚動遭謗毀無所避忌敷上封事
萬言有分封勢重輔導體輕萬一不幸有厲長吳淠之虞那
哈木來歸之時欽承

顧問宜待之有禮疑則勿任任則勿疑稍忤機權其徒必二
此類非一後皆意中封事留中又嘗為王國用草諫書言韓
國公事為詹徽所嫉欲中以危法又為夏長文作劾袁泰書
泰銜恨至深見常切齒但以不為屈膝之故竟致排誣累迹
深文之語皆非律令所該伏蒙

聖恩數對便殿中之以慰諭重之以錙錫許以十年著述冠
帶來廷元史舛誤承

命改修及踵成宋書刪定經禮凡例皆以留中奉親之暇杜
門纂述漸有次序荐將八載賓天之訃忽聞痛切之誠欲絕
向非

先帝之明縉亦無有今日是以丹喪在殯未遑安厝家君以
九十之年倚門望思皆不暇懸其一瞻

山陵隕淚九土何圖聖恩蒙一恩遠行揚粵之人不堪寒苦
復多疾病俯仰奔趨與吏卒爲伍低回伏事誠不堪忍晝夜
涕泣恒懼有不測之憂進不能盡忠干

國退不得盡孝于親不忠不孝負平生學問之心抱萬古不
窮之痛爲天下笑爲先生長者之羞是以數鳴哀感奠

皇天后土之鑒臨得還京師復見

天顏少陳情悃或遂南歸父子相見卽走也更生之日臨書
不勝感切願望之至

奉陳貳卿書

黃福

五月二十一日莫叅政至二十四日潘知府至二十八日陶
指揮又至惟陶有批未莫潘到時問至再三極知鈞候清吉
可慰而潘續云曾有幕府之鸞緘已葬神投之魚腹竟不知
二楮先生所載云何旣不得瞻手澤之光華又不得聞心聲
之清切使人疑其所謂益其所思雖藩宇之左瀘水之東亦
無以釋懸懸之懷也風伯不仁可恨也哉區區前已有書乏
便未發與發而沉者無異然慮其事深切于懷且莫遠運糧
黔公出哨若謂無人不信也翁挺來降阮彥出見雖彼勢衰

懼我威大若不得焚輿櫬亦難以秦凱歌演義之衆服者以
有大軍在也一旦班師難常按堵不特此也各營士卒造舟
楫辦戰器遠征近哨暑行瘴宿饑裸相仍疾病相藉不可謂
不勞矣已附夷民打船板納稅糧當差役垂髻戴白不得息
肩加以盜劫縱橫衣食窘迫不可謂不疲矣軍勞民疲財殫
師老守此而失彼得西而遺東而尚畏首畏尾左遮右護噤
無一語以達

九重是猶掩耳偷鈴諱疾忌醫也不知仁人君子深謀遠慮
長治久安果如是也不乎言自小子而行在閣下誠不以愚
言為迂而以力行為任請益以兵相地屯守養我士卒寬我
民力堅城垣利器械廣其屯田實其倉廩兵閑食足民安化
行則桑土帟戶之事備居重馭輕之計得誠如是也戰勝攻

取無適不然彼區區之賊獲與不獲降與不降又何足爲重
輕哉人嘗有言耕當問奴織當問婢閣下與元戎胸中自有
許多韜畧固不待人紛拏論也但慮及斯自不容已此論之
外示及造船合藥并取食物一一如命另有單陳不同于聽
今竝以先具未發之書併上要當合而觀之恃舊布忱故敢
率爾事機之暇亦可於戎闡處從容言之如其迂闊當即付
之千頃之陂毋啓人議可也西風鴻便亦宜寄聲卽今盛暑
尚冀調理

奉總兵官英國公書

交趾平定以來八年之內民已三變而兵亦三加矣原其所
自皆由惡本未盡除守兵不足用故也黎氏雖除而簡定存
簡定雖去而李擴在今李擴旣擒帥鎔景異之徒又以悉在

網羅而無漏者似爲無事矣然馭之有道則可以漸安守之無法不免再變何者陳元楷乃李擴昆弟也今雖遠遁視之若小可他日焉知不能爲簡定李擴之續乎僞官頭目今雖降附待之爲至厚焉知他日不能爲阮帥景異之亂乎今成功之將在此全盛之兵在此吾忝爲守官不於此時此際言其所以而共議守備之策以圖長久之治而乃亦曰安南從此無事矣是謂自欺也欺人也若恐於自欺苟且偷安似爲得計然當言不言何以辭君子公論之譏若曰欺人依違取媚噤無一語直至事壞而始上瀆

宸聰則亦無以免

朝廷法度之議慮至于斯言何容已謹將鄙見逐一條陳尚冀采擇幸寬狂妄

一本處地方前者賊未就擒蒙調三總戎大軍到來征守猶必三年之久而姑克清大憝今交趾都司衛所原守官軍見在既少而演又新平順化地方又闊迢迢千里無一兵守而止以上兵者若謂羈縻于一時則可若謂長治久安則未之信也三總戎若留十鎮守猶爲庶幾倘皆振旅而歸恐俘獻未至

京闕而警報已徹

聖聰矣乞蚤圖之

一交趾原留守兵九衛一所七分之二數通該四萬七千餘人在全盛之時而猶不能禦侮以致煩兵屢舉今事故之數四去其三以如此險遠之地反反之民而以舊日所遺一分之兵守之實未見其可也必須添置軍衛補完空伍庶免後艱

今將合設衛所去處開列于後

滇人一帶

黃江上下

太平等處海口

譚舍江

銳江

魯江

鹹子關

廣威天堂等處

靖安州萬寧等處

太原府官良等處

鎮夷關等處 海潮希江等處

一市橋所南有鎮夷北有昌江而本所居中且近實爲虛設如將本所移置芹站以控禦鎮夷關本關止令土兵守之如此則鎮夷隘留有相應之利衛所官軍免輪守之患

一歸化石廩關上通雲南臨安下貫嘉興三帶水陸數百里寥寥無一城守萬一有警仰之於誰莫若於臨安衛摘撥二所官軍於臨安府埭集三所民兵立一衛於歸化州如潼關

澤州大牙相制之例以控制上下地方便益

一丘温坡壘隘留三衛所原埭廣西土兵近年以來官不得人逃亡之數十去七八其一二分在役者率皆老幼貧弱代身有名無實是致盜常竊發路每不通如於廣西調一都指揮仍領原調官軍於丘温鎮守統行總督前項衛所土兵更選土官之能事者管之嚴禁不許雇倩代役務要正身將帶當房家小常川在役如此庶便

一廣西田州府去本處鎮夷關不遠彼處兵強弩利諒山一帶夷人畏之即今田州府知府爲事發隨韓總兵立功如將本人改授武職令選本府民兵三五千名親領於鎮夷關立衛控制不但服夷情抑且通道路

一靖安州萬寧等縣近接雲屯海口并連廣東欽州地方最

爲險要如將欽州千戶所添軍立衛或撥彼處衛所官軍或
塚彼處附近有司民兵以充其數內摘一所於萬寧等處設
立以控靖安地方以通廣東水路便益

一本處土兵首賊未就擒時急於用人許將各處人民聽從
土官自行招集而有司官謹於奉命無敢有違有徇情取占
親戚者有挾讐捉去者正吏卒者有全縣之民俱被占取者
亦有一家父子兄弟各自克兵及單丁貧窘自克一兵者後
雖委都布司官清理而土官紛紛言少又不准除歸併因循
苟且至于今日今隨征者月久不歸家業狼籍屯田者糧徵
不足荆楚連綿是致逃亡今已過半若不從新整理必至法
廢事壞難救其失必須再令都司布政司官嚴督府州縣官
將原集土兵并官下影占家人田奴盡行取勘見數汰其老

幼單弱者當民差選其富實丁多者爲兵役先議合用若干
衛所應撥若干土兵然後照數塚集總小甲千百長選管如
例每兵須以三丁共之官不許選以庸才兵不許雜以冗濫
選集既定卽分地方以近就近置立城堡或四六或中半各
專屯守不許亂差者警不拘其管軍官伴當亦如舊例就於
所管土兵內定數撥用仍造花名貫址文冊三司各收一本
照證按察司仍常委官點閱不許廢弛如此庶便

一各處僞官頭目及先曾授官後又從逆今招出降此等反
仄之徒直爲區處或量與官爵或分給田地使之得所以終
餘年不可置閑散懷抑鬱抱不平以貽後患

與行在戶部諸公書

周忱

伏聞治民之道在於禁惰游以一其志勸耕稼以敦其業蓋

惰游禁則土著固而避勞就逸者無所容耕稼勸則農業崇而棄本逐末者不得縱由是賦役可均而國用可足苟或不然則戶口耗而賦役不可得而均地利削而國用不可得而給先王制六鄉六遂之法以維持其民而均其土地者正爲此也邇者

皇上念天下人民有因饑窘逃移者累降勅旨設撫民之官頒寬恤之條令天下郡邑招而撫之諸公頒布奉行克謹無怠天下之民感戴

聖恩扶老携幼競逐桑梓惟獨蘇松之民尚有遠年竄匿未盡復其原額而田地至今尚有荒蕪者豈優恤猶未至于凡招回復業之民既蒙蠲其稅糧復其役室廬食用之乏者官與賑給牛具種子之缺者官與借貸 朝廷之恩至矣

矣如此而猶不復業者亦必有其說焉蓋蘇松之逃民其始也皆因艱窘不得已而遁逃及其後也見流寓者之勝於土著故相扇成風接踵而去不復再懷鄉土四民之中農民尤甚何以言之天下之農民固勞矣而蘇松之民比於天下其勞又加倍焉天下之農民固貧矣而蘇松之農民比於天下其貧又加甚焉天下之民常懷土而重遷蘇松之民則常輕其鄉而樂於轉徙天下之民出其鄉則無所容其身蘇松之民出其鄉則足以售其巧忱嘗歷詢其弊蓋有七焉何謂七弊一曰大戶苞蔭二曰豪匠冒充三曰船居浮蕩四曰軍囚牽引五曰屯營隱占六曰隣境蔽匿七曰僧道招誘其所謂大戶苞蔭者豪勢富貴之家或以私債準折人丁男或以威力強奪人子息或全家傭作或分房托居賜之姓而目爲義

男者有之更其名而命爲僕隸者有之凡此之人既得爲其
役屬不復更其糧差甘心倚附莫敢誰何由是豪家之役屬
日增而南畝之農夫日以減矣其所謂豪匠冒合者蘇松人
匠叢聚兩京鄉里之逃避糧差者往往携其家眷相依同住
或創造房居或開張鋪店冒作義男女婿代與領牌上工在
南京者應天府不知其名在北京者順天府亦無其籍粉壁
題監局之名木牌稱高手之作一戶當匠而冒合數戶者有
之一人上工而隱蔽數人者有之兵馬司不敢問左右隣不
復疑由是豪匠之生計日盛而南畝之農民日以衰矣其所
謂船居浮蕩者蘇松乃五湖三泖積水之鄉海洋海套無有
浮涯載舟者莫知蹤跡近年以來又因各處關隘廢弛流移
之人挈家于舟以買賣辦課爲名冒給隣境文引及河泊所

由帖往來於南北二京湖廣河南淮安等處停泊脫免糧差
長子老孫不識鄉里暖衣飽食陶然無憂鄉都之里甲無處
根尋外處之巡司不復詰問由是船居之丁口日蕃而南畝
之農夫日以削矣其所謂軍囚牽引者蘇松奇技工巧者多
所至之處屠沽販賣莫不能之故其爲事之人克軍於中外
衛所者輒誘鄉里貧民爲之餘丁擺站於各處河岸者又招
鄉里之小戶爲之使喚作富戶於北京者一家有數處之開
張爲民種田於河間等處者一人有數丁之子姪且如淮安
二衛蘇州克軍者不過數名今者填街塞巷開鋪買賣皆軍
人之家屬矣儀真一驛蘇州擺站者不過數家今者連薨接
棟造樓居住者皆囚人之戶丁矣官府不問其來歷里胥莫
究其所從由是軍囚之生計日成而南畝之農夫日以消矣

其所謂屯營隱占者太倉鎮海金山等衛青村南匯吳淞江等所基列於蘇松之境皆爲邊海城池官旗犯罪例不調伍因有所恃特肆豪強遂使避役姦氓轉相依附或入屯堡而爲之佈種或入軍營而給其使令或竄名而冒頂軍伍或更姓而假作餘丁遺下糧差負累鄉里爲有司者常欲挨究矣文書數數行移衛所堅然不答爲里甲者常欲根尋矣足跡稍稍及門已遭官旗之毒手由是屯營之藏聚日多而南畝之農夫日以耗矣其所謂隣境蔽匿者近年有司多不得人教導無方禁令廢弛遂使蚩蚩之民流移轉徙居東鄉而藏於西鄉者有焉在彼縣而匿於此縣者有焉畏糧重者必就無糧之鄉畏差勤者必投無差之處舍瘠土而就膏腴者有之營新居而棄舊業者有之倏往倏來無有定志官府之勾

攝者因越境而有所不行鄉村之譏察者每容情而有所不問由是隣境之客戶日衆而南畝之農夫日以寡矣其所謂僧道招誘者天下之寺觀莫盛於蘇松故蘇松之僧道彌滿於四海有名器者因保舉而爲住持初出家者因遊方而稱掛搭名山巨刹在處有之故其鄉里游惰之民率皆相依而爲之執役眉目清俊者稱爲行童年紀強壯者名爲善友假服緇黃僞持錫鉢或合併而修建齋醮或沿街而化緣財物南北二京及各處鎮市如此等輩莫非蘇松之人以一人住持而爲之服役者常有數十人以一人出家而與之幫閑者常有三五輩由是僧道之徒侶日廣而南畝之農夫日以狹矣凡此七者特舉其大畧而天下郡縣此弊俱無縱使有之亦未必有如是之甚此等之人善作巧僞變亂板圖戶口則

捏他故而脫漏田糧則挾他名而詭報惰游已久安肯復歸
田里從事耕稼况其缺乏稅額累累如配見在之戶其中頗
有智能者見其得計亦思舍畎畝棄耒耜而效其所為惟愚
騷無用之人方肯始終從事於農業然坐受其弊亦豈無避
免之心乎凡天下之事不可有一人之僥倖苟有一人僥倖
而獲免則必有一人不幸而受其弊蘇松僥倖之民如此其
多則不幸而受其弊者從可知矣是宜土著之農夫日減月
除而無有底止矣忱嘗以太倉一城之戶口考之洪武年間
見丁授田十六畝二十四年黃冊原該六十七里八千九百
八十六戶今宣德七年造冊止有一十里一千五百六十九
戶覈實又止有見戶七百三十八戶其餘又皆逃絕虛報之
數戶雖耗而原授之田俱在夫以七百三十八戶而當洪武

年間八千九百八十六戶之稅糧欲望其輸納足備而不逃
去其可得乎竊恐數歲之後見戶皆去而漸至於無徵矣是
皆惰遊不禁耕稼不勸故姦民得以避勞就逸棄本逐末如
前之所云者誠宜立法以檢制之撫民之官固未易以招之
也愚以鴛鴦之才盤叨重寄晝夜勞心莫知所措伏望該部
列位卿相與在朝公卿大臣詳加講究明白奏請將蘇松等
府逃移人戶不拘通例別立一法以清理而檢制之庶幾戶
口可增田畝可關稅糧可完忱事出激切不覺醜縷之至惟
冀詳察而恕其狂妄幸甚

皇明文衡卷之二十八


書

奉王冢宰書

周敘

太保冢宰抑菴大人先生閣下敘惟吾吉自有宋逮今賢才輩出為世道之重鄉邦之光者九賢也由茲以降匪無其人而俊偉光明卓然著稱為無瑕之玉無疵類之珠者殆亦鮮見焉敘於永樂宣德間嘗仰望少師東里先生可當之然迹其舉措究其底裏士大夫公論不容掩也竊自計之堂堂名郡際今

聖明大一統之時豈無復有歐陽于胡澹菴周平園楊誠齋文信公其人者出邪為之徘徊歎息翹佇思慕者又矣茲乃於大人先生而見之得非吾吉賢才之運國家養士之效之



所鍾哉非特敘與吾郡之士動喜天下士大夫亦莫不爲之更慶而交賀也伏惟先生處在屯之際翼戴

今皇帝嗣大統處大事濟大艱其時其事視諸前輩又甚難者竊謂膺天下之重任必當心天下之大憂成天下之大計而後可以有濟其要無他在於用君子遠小人而已若兩存之譬如持衡之勢此重則彼輕彼輕則此重難並行不悖也蓋小人易進難退君子未有不爲所擠者當茲維新之始主上內外惟先生是倚得不毅然任其責而無少有回顧之慮乎使少有回顧非惟朝廷大事難濟於夫所謂爲世道之重鄉邦之光者亦難望其全矣敘閑中窺察其人若今某公某及其公某公皆君子也其已同朝者宜傾竭倚注之彼在遠在家者宜卽日豐驛召以來之與之朝夕圖惟同心同

德以處大事濟大難幸甚遠小人之道宜徐爲之謀強壯者俾膺重鎮於一方年老者許彈劾致仕於其家餘未有顯著之迹蘊堪用之才者存之彼自相發奮洗濯琢磨爲君子之歸矣其他內外防微之政宜與三四君子因人所建白不動聲色以漸處之可也得非謹始執要之一幾邪易曰知幾其神乎書曰慎終于始又曰惟克果斷乃罔後艱竊思我

朝當三楊先生輔政之初一幾也不深思熟慮身任其責惟陽敏陰施掩人耳目雖曰自保其實誤國故致今歲七月之禍此時先生與諸君子輔政之初又一幾也宜鑒覆轍爲宗社生靈永遠之謀開天下後世太平之治俾歐陽子周平園之事業復見今日顧不偉哉失今不圖恐異日噬臍之悔莫及矣豈得卽能效張子房之從赤松子裴晉公之營綠野堂

之時伏願先生斷斷若般之伊傅宋之韓范以天下爲己任
爲心毋徒諉曰尚有某有某而不敢自專爲辭若然史臣輩
將執彤管磨崖石以紀勒先生之大勲垂示無窮之不暇則
天下之大憂大計可收厥效矣救賴 朝廷之恩先生惠以
一介書生官至學士榮矣叨居南京秩清務簡樂矣此外無
纖毫求進之心况冒膺宋史之修倘不即死成此一事竊名
穹壤間他富貴皆無所望第學識淺陋不足以當耳所念者
國家安則臣民皆安救輩亦可偷生畢其素志今歲以來
因 朝廷屢有更張事不敢避禍亦屢有所陳無非爲求天
下之安故也未審朝議以爲可采否自是以往亦不復敢瀆
告一語矣伏乞先生垂仁誘掖曲全之感德感德敎兩歲愚
脾疾今秋復作兼以左身風痺未知可遣生否恃平昔從游

門墻兼辱教愛故不得不有言然前此未嘗敢一奉問也茲
因論秘時急務不免覩縷于冒崇嚴恕納不宣

答國子監丞閻禹錫

李賢

昨得足下書及復披閱足見才識高遠出於尋常萬萬比嘗
痛恨自己立志不堅無所成就不免虛過一生得見足下篤
志進學如此亦爲幸矣故以書相勉且道理無窮雖古之聖
賢亦未敢自以爲足足下謂於道半明半暗未得打成一片
而受用雖云謙辭蓋亦自知之明有益求長進之意在於不
言之表矣但謂向上一節無誰與講是以舌本又強教無所
施詳味其言則向上一節惟足下自知更無一人可講可教
者夫向上一節豈易知而天下之士豈易輕邪雖周程張朱
造道之深何嘗自謂獨知向上一節遂謂天下之士不可與

講而教無所施也况在已於向上一節或未能盡知而教人之具或未必無缺遽謂不可與講而無所施毋乃忽於自察乎且既自以爲半明半暗是模範未備於已而謂教無所施可乎既自以爲教無所施是師道已足乎已又何親炙於人而賴其資乎所引韓退之云莫爲之前雖美而不彰莫爲之後雖盛而不傳自謂不敢如此且退之與于襄陽書有所干求故發此相須之言以揀制之期於必聽豈聖賢道德之言邪况於此書前後篤志進學之意亦不相類而足下引用其中誠所未喻夫以足下致書盡禮如此豈可輒於辭語之間洗垢索癢誠愛足下之深務期造於醇正之地故耳幸勿以爲狂率而鄙外也及觀佳作數篇辭意高古可喜但爲文責條暢只看晦菴草蘆之文如行雲流水理明意到初無險礙

讀之令人快然於心二儒詩文累牘可謂多言矣於道不惟無害而且有所發明更望足下取法焉

與安南國王書七

錢溥

一委廣西南寧府差
官齋至本國界

欽差龔封正使翰林院侍讀學士錢溥副使禮科給事中王豫會同欽差司禮監太監柴昇奉御張榮端肅致書于攝安南國王竊惟善處世者貴達經權之道而善知人者在察誠僞之幾使知經常可守而不達權時之宜膠柱鼓瑟之人爾焉望世之能處哉人多欺僞之弊而已無先見之明坐井觀天而已爾尚何人之能知哉此天下不能無是事也竊欲爲王言之王寔始封安南國王之孫傳父及兄至王蓋四世矣况王材足以靖亂賢足以得國禮請

天朝名正而言順可謂適經而與權一誠而無僞者而何待於言爲哉今王發政施仁之始正百官承式之時使往事之未明恐後疑之復啓故言之不能以自已也初黎氏得國于陳我朝廷念陳日燿率先歸附世賁不絕恐視其子孫滅亡而不顧哉一舉伴獲以爲內屬且俟其子孫之可復者奈訖無可復之人而王祖又爲國人所依附遂俯順其封以奠我南服傳及三世好同一家豈意琮賊以庶篡嫡昧死來求且曰游湖自溺意在不弔其忘君之心見矣朝廷速命信使往封冀朝發而夕至其國詢及溺死之故則琮必難爲言曰君其問諸水濱也歸言于朝豈無偏師及境以一正其罪邪使將及境琮已就計且告計請封之使來卽遣行人往祭而尤恐復有如琮之請者乃遣錦衣使者偕廣西巡按御

史及鎮守三司官私于境上而知王爲第四子毋子皆賢禮所當立然後命溥等爲使以錫封焉則我朝所以保黎氏而惟恐立非其正者豈下於保陳氏哉凡遣使至京翱翔萬里聽其所往懋易有無入市不變如子於父母家任便取適而已豈有密切僞爲之計哉此皆王之所知也又聞太祖高皇帝平定之初安南首至而朝鮮稍後且不誠聖諭切責之曰汝所持者一海爾汝能恃之我亦能渡之遂格心向化表于東土幾百年矣頃與女直等國有僭越志諸國來聞使行人私焉頗得其跡遣給事中張寧賚詔往問王卽蒲伏叩地至不能起且責之封人而已不知開安南累及此哈密越在流沙萬里外實西域諸番之門戶其王爲下所弑毋老子幼勢亦殆矣毋太如來聞遣通事沙廷玉率其

類數十人往立其子得元惡十有八人太妃曰此

天朝所得宜即天刑遂檻赴京師以正其罪

安南建歲篡奪未嘗諱正天討

敵臣使則我朝於四方萬國抑強扶弱植顛起仆使之各

寧土宇而同享富貴于無不覆載之中寔父母其心天地其

量而日月其照臨也較之安南臣伏南陲謹守禮法而聲教

之外不煩于我一使者宜保其後待其使有加于諸國也而

何我使初入則言語不交主僕呈散迂涉峻嶺迫邇兵械使

人撼頓抑塞而不安如待以暴客然者其果出於誠乎既至

而待之則自徐侍郎等來以東西向坐邊行人等來以南北

向坐至黃瑯等來則書往復數番辯至七日而始定為並南

向坐然則何為是不同乎豈顛倒我豪傑而使之為間乎抑

禮始粗備至是而將定乎願明以告我也元史載世祖詔安

南曰來奏有一家之言今聞釋刺丁云彼多回鶻禁約不扣

交談果如是言一家之禮有如是邪其後俗終不變卒至兵

連禍結而國僅存幸入我朝而始靖豈更化又百年而習

俗終未變邪傳曰魯不棄周禮未可動也又曰晉未可媮也

其朝多君子季札聘魯見舞簫韶而嘆盛德孔子見郊子得

聞官制而曰天子失官學在四夷是皆以禮樂制度維持其

國於周室傾危之時罔以內外而有間也况我朝之於安

南一惟禮文相與而各極事大字小之誠而何獨不誠於待

使邪或者居先王之左右者好是狡偽以為功也故於王初

即政而言之瀟等叨

天子侍從密勿之臣加以太監等又惟幄寵臣故特簡

命與之偕來王亦知非往使比矣果能改而待之以誠否乎

王宜速令使者出境相候擇定吉日并迎接開讀宴會坐向等儀注來勿事退讓以勤往復務酌古而準今之宜革薄而從忠之厚將於是乎觀禮毋徒謂曰未見顏色而言謂之誓也溥等肅奉

二回儀

欽差襲封正使翰林院侍讀學士錢溥副使禮科給事中王豫會同 欽差司禮監太監柴昇奉御張榮端肅致書于攝安南國王惟安南素稱文物邦其畏天事大之誠固無所不至而獨於待使之禮尚有所不一者故溥等奉

聖天子恩命觸萬里炎熱而來方抵南寧即馳書于王願聞所以不一之故庶將事之際有恪而無疑也比入關二日王遣阮善來曰不敢回書惟見教王之意厚矣然鍾未有不扣

而自鳴者故諭善以復曰王其無書決難定禮且使聞諸執政者曰國於是時當開心見誠勉圖中道以成吉禮不宜往復論辯使王心不安爲此言者譬人之受病誤餌其藥則病雜矣後之醫者不發其源而究之將何以臻效故善回甫五日果以王書來始知所以不一者禮雖無據言則可信是受病之源已見而求療之心亦篤矣然九持二端而未一者尚恐投劑之復誤乎噫是未暇與深辯也今夫禮者所以辯上下而定民志也辯以明其分之不一則協其志于克一大抵一則誠二則雜書曰德惟一動罔不吉德二三動罔不凶此之謂也茲欲合二三而一之蓋有

祖宗之定制在定制者何 大明集禮一書我太祖議禮以一天下者也其間載安南宴坐與夫頒 詔儀

注甚詳何王之先君不此之求而惟以洪武禮制 詔行司
府者言之宜有以來竝坐向南之說也雖然昌歎薄味也而
周公辭之謂無德不敢以當備物之享繁縷小物也而孔子
惜之謂名器不可以假人古之謹禮於微也如此而况我
祖宗定制布在方冊昭如日月而敢昧之以貪殊禮况今頒
詔授封領勅之禮竝行謹按集禮所載而參以禮制及古禮
之可行者共爲儀注六條王其嚴命有司行之豈惟有以新
子之國亦克求世而無愆矣幸毋惑於故老之談曰吾先君
未之行也而忽焉薄等肅奉

三論禮

欽差襲封正使翰林院侍讀學士錢溥副使禮科給事中王
祿會同 欽差司禮監太監柴昇奉御張榮端肅致書于攝

安南國王前書回云宴坐之禮前輩講定至黃卿始爲不足
法劉行人能不改其舊此皆無據之言而可以服吾輩乎可
以服天下後世乎宜黃卿執之爲是也僕等想王之爲此言
者技止乎此故不復與辯而直以古今大禮相與講而行之
蓋以洪武禮制所載皆詔行有司而未及蕃國 大明集禮
所載有詔行蕃國而未及封拜故酌古準今而成此使其昧
此而一以禮制竝坐向南執之則王亦何辭以辯而僕存此
心其如國之山川鬼神何王不復察此又欲易國卿之禮如
殿坐之儀則已自王之矣何必請

命九重之上而勞人萬里之外哉若曰

王命未宣而未敢遽相勞則天下豈有不飲食而行事者蓋
與王初見又在禮不在物也噫惟天不可以爲欺惟人不可

以偽感王其察焉若夫漢語國音竝用兩不相疑何失之有
冕服之制以俟奏請而行可也誠欲相見請改書以從溥
等謹復

四再論

欽差襲封正使翰林院侍讀學士錢溥副使禮科給事中王
豫會同欽差司禮監太監榮昇奉御張榮端肅書致攝安
南國王竊以出郊迎勞之禮當盡賓主南北之說者公館非
殿也冠服猶卿非王也是宜執禮度於分內溢慰論於言表
然後導迎恩命宣揚國都東西宴會以如儀彼此交驩而
成禮豈不隆一代之美談彰一時之盛事哉是皆發乎至情
合乎中道可以坦然由之而無疑者而王獨不此之信謂天
命不足畏而可以坐致之謂天使不足敬而可以王禮忽之

將猶楚子受玉而情成子受脰不敬之歸矣豈知魯公如晉
悼出國都以接之向戌來魯襄盟于劉以待之而皆不以爲
過者哉今王天資高邁學問淵篤禮足以行已和足以得衆
宜有出境待人之謙而無情與不敬之失矣然猶致是之紛
紛未决者毋乃異論以惑之手繼今當召自宮中府中以及
街衢奔走遊說之徒而問曰天使駢節於近郊有日矣當
以卿禮接之乎抑以王禮加之乎彼必無貴無賤無長無幼
無遠無近咸應之曰宜以卿禮接之王則得封而後可然後
遣一介來曰王悟矣敢犒于執事則僕等何辭之有亦何煩
異論之有茲承阮堵阮廷美來詢動止遂布此以聞惟王勉
自處焉溥等謹復

五再論

欽差襲封正使翰林院侍讀學士錢溥副使禮科給事中王
豫端肅書復安南國王伏自寓館以來王之牢醴餼稟日盈
于始而謙摛敬慎不替于終行人何以臻此瀕行又辱贖遺
感愧何量然嘗聞之宋人或得玉獻之子罕子罕弗受獻玉
者曰以示王人玉人以爲寶也故敢來獻子罕曰爾以玉爲
寶我以不貪爲寶若以與我皆喪寶也不若人有其寶茲者
奉德音揚清光惟恐弗職以忝恩命若受之豈惟失
寶抑速戾滋甚矣古人有曰事大在共其時命字小在恤其
所無王之事大雖國所無亦克唯命是共矣此未之能
恤也而况厚贖之復加哉用此敢辭不宜溥等同拜

六
私贈

欽差襲封正使翰林院侍讀學士錢溥副使禮科給事中王

豫端肅致書于安南國王昨者迎恩亭上荷王執盃眷戀
之深送舟疑竚之久斯情何以云喻又况贈賄之辭未畢而
納善之禮復加舟次之拒已絕而馳遠之使卽來此將物以
表其情也殊不知物盡則情亦盡矣曷若泯其物而使斯情
恒懸懸于中哉關山迢遞日遠日深瞻仰無由豈勝旣念不
宣溥等肅奉

七
私贈

欽差襲封正使翰林院侍讀學士錢溥副使禮科給事中王
豫端肅致書于安南國王奉違以來蒙遣近臣黎弘毓阮堵
等伴宿二人學行周洽寔王所任使親信之臣不可以一日
離者特徹以祖送至於浹辰之久幾乎千里之遠而不恤是
固敬事

朝廷以及行人之禮然而加厚斯文之情亦有在矣孰意行
頃復出所辭納善之金以溷我行李則王所以愛之者又何
若是其涼哉夫禮無加貨事無二成古之使者嘗謹於此矣
用是返璧幸無見譴非此二人不能盡其情也乘此清風欲
歸去而南望青冥不過一輪明月共照此心而已溥等肅奉

與王大理同節論文書

劉定之

陰德三積之序殆非同馬君實之言考於本集無之昔者孟
子謂今之人脩天爵以要人爵董子謂仁人正誼不謀利明
道不計功以其所脩所正所明者雖是而其要之謀之計之
者其心非也若君實云積陰德以爲子孫長久之計則亦今
之人而非仁人矣司馬君實者孟子與董仲舒之徒也而爲
此言尚安得從二子之後以至今立於孔子之庶乎君實之

相其主以改新法也人懼之以禍則曰天若祚宋必無此事
病且殆猶曰死生命也爲之益力夫改新法而不避後患豈
有積陰德而欲圖後福也哉故愚謂此非君實之言也今人
以此言爲出於君實者取信於趙子昂所書子昂要爲不足
以知君實者其畫人馬竹梅工書能詩蓋王摩詰李伯時之
流當其存日見輕於姚燧良有以也且多寫老釋二氏之書
其自稱曰三教弟子何足以知君實哉本其以宋宗室立宋
之朝末亡而臣元大節已失故自放於詩酒書畫之域後之
君子不於其言行取信焉可也

皇明文衡卷之二十九

記

閱江樓記

宋濂

金陵爲帝王之州自六朝迄于南唐類皆偏據一方無以應山川之王氣逮我

皇帝定鼎于茲始足以當之由是聲教所暨罔間朔南存神穆清與天同體雖一豫一遊亦可爲天下後世法京城之西北有獅子山自盧龍蜿蜒而來長江如虹貫蟠遶其下

上以其地雄勝詔建樓於顛與民同遊觀之樂遂錫嘉名爲閱江云登覽之頃萬象森列千載之秋一旦軒露豈非天造地設以俟大一統之君而開千萬世之偉觀者歟當風日清美法駕幸臨升其崇椒凭闌遙矚必斂然而動遐思見江漢



之朝宗諸侯之述職城池之高深關阨之嚴固必曰此朕櫛
風沐雨戰勝攻取之所致也中夏之廣益思有以保之見波
濤之浩蕩風帆之下上蕃舶接跡而來廷蠻琛聯肩而入貢
必曰此朕德綏威服覃及內外之所及也四夷之遠益思有
以柔之見兩岸之間四郊之上耕人有免膚駮足之煩農女
有捋桑行簪之勤必曰此朕拔諸水火而登于衽席者也萬
方之民益思有以安之觸類而推不一而足臣知斯樓之建
皇上所以發舒精神因物與感無不寓其致治之思奚止閱
夫長江而已哉彼臨春結綺非不華矣齊雲落星非不高矣
不過樂管絃之淫響藏燕趙之豔姬一旋踵間而感慨係之
臣不知其爲何說也雖然長江發源岷山委蛇七千餘里而
如入海白涌碧翻六朝之時往往倚之爲天塹今則南北一

家視爲安流無所事乎戰爭矣然則果誰之力歟逢掖之士
有登斯樓而開斯江者當思

聖德如天蕩蕩難名與神禹疏鑿之功同一罔極忠君報上
之心其有不油然而興邪臣不敏奉
旨撰記故上推宵旰圖治之切者勒諸貞珉他若留連光景
之辭皆畧而不陳懼褻也

琅琊遊記

洪武八年十一月壬子

皇上以皇太子暨諸王又處宮掖無以發舒精神命西

幸中都沿道校獵以講武事濂實奉詔扈從十有二月戊午
次滁州驛濂進啓曰臣聞琅琊山在州西南十里晉元帝潛
龍之地帝嘗封琅琊王山因以名頗聞秀麗偉拔爲淮東奇

觀願一遊焉而未能也敢請

皇太子驩然可之卽約四長史同行 秦王府則林伯恭
晉王府則朱伯賢 楚王府則朱伯清 靖江王府則趙伯
友遂自驛西南出過平臯約三里所望豐山盤互雄偉出琅
琊諸峯上唐梁載言十道志又云豐亭山山上有漢高祖祠
又有飲馬池世俗妄傳漢高祖曾飲馬于此

國朝以山麓爲畜牧之場別鑿池飲馬仍揭以舊名居人指
云山下有幽谷地形低窪四面皆山其中有紫微泉宋歐陽
公脩所發泉上十餘步卽豐樂亭直豐樂之東數百步至山
椒卽醒心亭由亭曲轉而西入天寧寺今皆廢唯涼烟白草
而已濼聞其語爲悵然者久之山東南有栢子潭潭在深谷
底心裏故餘色正深黑卽歐陽公賽龍處上有五龍君祠

皇上初龍飛屯兵于滁會旱曠親挾雕弓注矢於潭者三約
二日雨如期果大雨及

御寶曆爲作欄楯護潭且新其廟廟側有時若亭濂坐亭上
問潭側雙燕洞及其南白鶴洞以肆窮覽人無知者乃止復
西行約三里許有泉瀉出於兩山之間分流而下曰釀泉潺
湲清澈可鑑毛髮傍岸有亭曰漸入佳境今亦廢唯四大字
勒崖石間淳熙中郡守張商卿等題名尚存沿溪而上過薛
老橋入醉翁亭亭久廢名人石刻頗夥兵後焚煉爲堊殆盡
亭後四賢堂亦廢亭側有玻璃泉又名六一泉石闌覆之闌
下壓以巨石中疏一竅通泉徑可五六寸手掬飲之温是日
天陰雪花翩翩而飄伯清倡曰雪作矣不還將何爲濼遊興
方濃掉頭去弗顧其步若飛歷石徑一里所至回馬嶺伯友

追而至伯清繼之伯友曰二客足力弱不能從矣二客伯賢
伯恭也其謂回馬者建炎寇盜充斥郡中向子伋因山爲寨
植東西三門西曰太平東乃回馬也嶺之東有醴泉又其東
南有栲栳山之南有桃花洞又南有了頭山山之下有熙
陽洞皆未暇往蛇行磬折菑茅白茸間莽不知所之宋熙寧
初僧崇定獲佛舍利六百顆右爲四十九塔於道隅疊疊如
貫珠塔雖廢幸有遺址可憑徑行無疑其路若窮又復軒豁
蓋峯回路轉九鎖而至開化禪院在琅琊山最深處惜乎
山皆童而無蔚然深秀之趣唐大曆中刺史李幼卿與僧法
深同建此院卽張文定公方平寫三生經處三門外有觀音
泉入院皆瓦礫之區唯新構屋三楹間中施佛像僧紹寧出
速坐方定龍興院僧德學同

太子贊善孟益 秦王伴讀趙鑣 吳王伴讀王驥 楚王
伴讀陳子晟聞濂入山咸來會晟云太子正字桂彦良憇六
一泉上亦足弱不能進恐隨二客歸矣寧具飯飯客飯已寧
引觀瘞子泉泉出山罅中乃幼卿所發李陽冰所篆銘銘已
亡張億書三字碑亦斷裂卧泉下石崖上多諸儒題名陷爲
一方鐫勒其中自皇祐淳熙乾道以來皆有之字或篆或隸
或楷或可辨或不可辨山之東西在在皆然不特此泉也泉
之南有白龍泉禱雨多驗童行堂下有明月溪稍南有吳道
子畫觀音及須菩提像刻石壁上傍鐫淮東部使者八八舜
臣琅琊山記頗不合文體爲之破顏一笑又稍南有華嚴池
由明月而上入歸雲洞訪千佛塔遺址過石屏路俯窺大曆
井井亦幼卿所鑿沿山腰陟磨施嶺遠望大江如練鍾阜若

小青螺在游氣冥茫中嶺下有琅琊洞洞廣兩室中有一穴深不測名人題識無異庶子泉懼日夕復不暇往焉自幼卿博求勝跡鑿石引泉以爲溪左右建上下坊作禪室琴臺後人頗繼其風山中之亭幾二十所而日觀望月爲尤勝今荆榛彌望雖遺跡亦無從求之可歎哉天亭臺廢興乃物理之常奚足深慨所可慨者世間奇山川如琅琊者何限第以處於偏州下邑無名勝士若幼卿者黼黻之故潛伏而無聞焉爾且幼卿固能使琅琊聞于一方自非歐陽公之文安足以達於天下或謂文辭無關於世果定論邪然公以道德師表一世故人樂誦其文不然文雖工未必能人傳也傳不傳亦不足深論獨念當元季繹騷竄伏荒土朝不能謀夕今得以厠跡朝班出陪

帝子巡幸而琅琊之勝遂獲窮探豈非

聖德廣被廓清海寓之所致邪非惟濂箒獲活化育生成之恩而山中一泉一石亦免震驚之患其宜播之聲歌以侈上賜遊觀云乎哉因取醉翁亭記中語風霜交潔水落石出字爲韻各賦一詩授主僧紹廣刻諸山石云

游荆塗二山記

濂既遊琅琊山起行至池河驛適郵卒逸內使監公牒至及開緘中藏濂梁古跡一卷宸翰親題其外今濂搜訪與青宮言之濂因啓曰臨濂古跡唯塗荆二山最著圖經塗山在昔鍾離縣西九十五里荆山亦在縣西八十三里二山本相聯屬而淮水繞荆山之背神禹斡闢使水流二山間其跡斲矣蹤故在人思其功迄今弗能忘

青宮曰至中都當在遊馬余將度淮狩于王莊先生宜泝流而上屆今懷遠縣以俟廉奉 教行以洪武乙卯冬十一月乙巳發舟庚午日曠始泊縣西門而

青宮已駐驛於門東五里矣辛未濂上謁

青宮下令以壬申遊二山濂至期約懷遠文學掾王景彰宿舟中黎明擢舟至塗山足曳杖入山山傍廢址舊皆民廬前度石梁復斗折而北累石爲墻多藝椒之園行可三里餘視大磬石青綠間錯頽然歎足坐諦視之乾薛交封之耳聞有草生石上高一尺其花可玩不假土力人取懸檐間呼爲石連華復行四里所巖石聲確挿起道左危傾欲飛墜覆二里所微徑入灌莽抵巖罅貯泉一泓味甚甘覆以生茨曰聖水亭取水以榮雨多驗復一里餘至山巔禹廟在焉廟已毀唯

頽垣破礎存游目四顧長淮西來渦河北匯而壽春臨濠宿州之境皆在冥茫昏杳中緬想南北戰爭也成處爲慨者久之山之下聚落甚盛廟史云名禹會林乃禹會諸侯之地廬舍之比如櫛移踵入廟廟前杏樹一章大可蔽二牛二栢參差左右樹東宜小甕杏柯之水時津津滴其中廟史云當晨霧四集水愈多其來如泉可代井石碣二一大書有夏皇祖之廟六字下方刻宋慶元初州守劉仲光自造禱雨記一亦記禱雨事皇甫斌紹熙庚戌來爲郡命鍾離尉丁夫築作石未泐文尚可讀復從廟西循石坡而下鉅石危立如人形遙望之一嫗儼然也相傳爲荅母石廟史云居人每到羊豕祭之至以粉黛飾其貌聞之不覺失笑山峻舊有僧房今廢久俟 鶴駕不來忽使者至云扈從士馬多無橋可以度河

青宮不復至矣言未既但見旌旗如錦綉搖曳上荆山矣濂亦下麓入縣廟見所題碑神號鄙俚棄而不暇出讀祖無擇所賦歌京口孫臨爲書碑蓋無擇謫守壽春過此而作也復北經縣治折而東行約三里所至荆山梁魏交闢時就山築堰以灌壽春其遺跡猶班班可見復行三十步崖广如屋側身而入石平如床座可坐人號爲卞和洞自西上復一里所過避雨石石斜倚可避雨故名復六十步至產玉坂奇石駢立玄質而白綠粲如雪西有玉池榛荆迷路不可尋景彰欲導至青峯庵足倦遂止時

青宮已獵遠郊濂因登舟先還中都云惟二山見諸載記者其說多乖舛以塗山言之春秋左氏傳云禹會諸侯於塗山杜預注云在壽春縣東北說者云今濠州是也國語史記則

又云禹會諸侯於會稽故會稽亦有塗山吳越春秋亦以塗山在會稽又兼載塗山之歌應劭云塗山在永興北說者云今會稽蕭山縣是也是二說已不能歸於一致矣至於蘇鶚演義又云塗山有四一會稽二渝州三濠州四當塗然其處皆有禹跡或者遂調禹之治水固當徧歷宇內而會諸侯實在會稽之塗山柳子厚塗山銘蘇子瞻子由塗山詩指在濠州者皆非是濂之存疑未決者一也以荆山言之荆山楚山也楚之先王熊繹僻在荆山篳路藍縷以處草莽傳至成王始盛又七傳至昭王始遷都郢招王有言曰自古先王受封望不過江漢河非所獲罪則楚之封疆可知郢卽今江陵其地有荆山一名景山荆故楚號也有之誠宜世則謂在濠州濠州古鍾離子國與壽春密邇楚自昭王之後又歷十一傳

至考烈王始徙都壽春韓非子所載下和獻玉事乃在厲武
文三王之際昭王上接武王已越十世當三王時鍾離何嘗
屬楚而強謂卞和至此山邪新序又謂抱玉而泣在共王之
時雜記又謂在懷王及其子平王之時平王乃昭王之父下
距懷王九世共王上至武王亦六世何至顛倒錯亂如是邪
濂之存疑未決者二也大抵山川遺跡非本諸經史者多不
可信葛洪丹井與郭景純之墓在在有之縱以高世之智將
何自辨其真偽邪必欲可信塗山當稽之左氏以壽春為正
荆山當證諸史傳以江陵為正有謂塗山氏乃故國名禹會
娶其女者別是一說與此殊不相涉也濂竅矣諸書遺忘欲
盡所記憶者未必無舛訛輒緣紀遊因掛漏書之以發同遊
者一笑同遊者蓋

太子正字桂彥良 晉府長史朱伯賢 楚府長史朱伯清
吳府伴讀王致遠及景彰云後一月某日記

宋九賢遺像記

濂溪周子顏王潔額以下漸廣至顴而微收然頤下豐腴脩
目末微聳鬚疏朗微長頰上稍有髯三山帽後有帶紫衣褒
袖緣以皂白內服緣如之白裳無緣烏赤色袖而立清明高
遠不可測其端倪程子色微蒼甚瑩貌長微有顴眉目清峻
氣象粹夷髯四垂過領袍土黃色無緣內服領以白皂緇帽
簷高白履和氣克浹望之崇深伊川程子貌勁實顴微收色
黃而澹目有稜角髯白而稍短在頰者尤短而翩翩若飛動
帽袍與履咸如明道嚴而立剛方莊重凜然不可犯康節卻
子色微紫廣顴身頰然有顴特然其下羶骨爽而神清鬚長

過領內服皂領帽有翼圍之袍緇履如伊川聳肩低袖手立而晚視坦而莊和而能恭橫渠張子面圓目以下微滿而後收色黃鬚少短微濃衣帽類康節履亦如之高拱正立氣質剛毅德盛而貌嚴溫國公司馬子色黃貌癯目峻準直鬚疎而微長半白在耳下者亦半垂耳輪闊微向面幅中深衣大帶加組方履黑質白絢總純絪前微下而張拱指露袂外有至誠一德不以富貴動其心之意晦庵朱子貌長而豐色紅潤髮白者半目小而秀求脩鰭魚尾望之若英特而溫煦之氣可掬鬚少而疎亦強半白鼻與兩顴微黧黧微紅右列黑子七如北斗狀五大二小六在眉目傍一在顴外一在唇下鬚側耳微聳毫生竅前冠緇布冠中以紗御上衣下裳皆白以皂緣之裳則否束緇帶躡方履履如溫公拱手立舒而能

恭南軒張子姿貌恢偉眉目聳秀白而潤豐下少鬚神采瀟然柳冠紗巾道服青皂緣繫以緇履白坦蕩明白使人望而敬之東萊呂子形貌豐偉顏色溫粹眉厚而秀髭淺而有衣道服皂緣冠幅巾躡皂履望之似嚴毅就之如入春風中金華宋濂曰天生九賢蓋將以明斯道也今九京不可作矣濂寤寐思之而無以寄其遐情輒因世傳家廟像影參以諸家所載作九賢遺像記時而觀之則夫道德冲和之容嚴然於心目之間至欲執鞭從之有不可得於戲九賢亦夫人哉

新雨山房記

諸暨為紹興屬邑與婺鄰國初得婺時伐僞吳張氏相持未決兵守諸暨界上張氏恃諸暨為藩籬棄間出兵侵掠兩軍屠戮無虛時故諸暨被兵特甚崇甕巨室焚為瓦礫灰燼

竹樹花石伐斲爲樓櫓戈砲樵薪之用民懲其害多徒避深山大谷間棄故址而不居過者傷之今

國家平定已十餘年生民各安其業吾意其中必有修飭室廬以復盛時之觀者而未之見今年邑士方伯脩爲余稱其友張君仁傑居諸暨北門之外故宅昔已燬及兵清事息始闢址夷穢創屋十餘楹旁植脩竹數百四時之花環藝左右琴床酒爐詩畫之具咸列于室仁傑未亂時嘗有祿農至今郡縣屢辟之輒辭不赴以文墨自娛甚適號其室曰新雨山房願得余記之一室之廢興爲事甚微然可以占世之治亂人之勞佚非徒然也方兵革之殷人有子女金帛懼不能保雖有居室寧暇完葺而知其安乎糗梁芻蕘之需叫號徵達者填于門雖有花木之美詩酒之娛孰能樂之乎今仁傑獲

俯仰一室以察時物之變窮性情之安果誰使然也非上之人撥亂致治之功耶自古極治之時賢且能者運於上隴畝之民相安於下而不知其所由然饑飽歌呼秩然成文成周盛時之詩是也安知今不若古之時耶仁傑其試爲之余他日南歸駕小車過北門求有竹之家而問焉仁傑尚歌以發我余當鼓缶而和焉

五洩山水志

五洩山在發杭越三州境上北距富春南據勾無東接浦陽其山水最號奇峭齊謝玄卿嘗以採藥深入其中而宋刁景純吳處厚亦頗游焉自西坑嶺入過遇龍橋北行二十步始入西潭前橫一溪水甚寒履之如冰由溪而前徑小潭傍有樵石突起類大甕針覆乃捫石而登一失足輒墜又行二里

所地稍夷曠怪石四瞰峯巒環列獻狀其紋縈紫然類神工
鬼斧所雕刑者山多狻遊人或恐之撒石亂下如雨又前行
半里所泉自石竇中出瀏瀏作聲若琴若笙竽泉西流匯爲
小窪瑩澈泓澈毫髮不隱儵魚數尾洋洋往來如行琉璃瓶
中見人至潛去窪在大樹離立極怪偉倒影入水中如画又
前行五十步大石關道相傳有岩角肖鷹喙忽夜大雷雨驟
崩下聲聞二十里又行三十步榛篠成林翠光浮映衣袂成
碧色山蟲崖虺奔逸後先瞬目失所在至此則氣象陰幽絕
不類人世如升蓬嶠坐水晶宮生平烟火氣消盡又自山腰
緣葛而前竹籜覆地厚動足輒仆又過十步許抵小潭小潭
上曰西潭流水傾沫成曰簾澗可七八尺冉冉下注滑而無
聲兩傍石崖峭立苔蝕薜暈時有水珠絺絺滴下歲旱鄉民

禱龍於此遇禱水或湧取蜥蜴入瓶盂中持以歸多驗自遇
龍橋至此約可五六里皆蛇盤磬折路行若窮又復軒敞其
中勝致難得具記或言潭上有石河從石河至三臺塔人跡
罕至莫詳也尋故路而出斜迤而東過香爐峯峭拔上有石
類香爐故名香爐北有峯圓而童名鉢盂峯或曰肖東旣鴈
蕩又名鴈蕩峯由鴈蕩而南時有白雲覆於谷者曰雪峯屹
然人立者名玉女峯蘄蘄勢欲拄天者名天柱峯其他諸峯
星聯肺附登名圖籍者蓋七十有二馬復從崖東折度畧約
橋趨三學士院院唐靈默禪師道場師嘗降龍於此遺跡尚
存由院北深入又百餘步至東潭潭上飛瀑可二十丈瀑怒
奔倒擊崖竅中若運萬斛雪從天擲下白光閃閃奪人目睛
至潭底輒復逆上有聲如輞雷人笑語咫尺不能辨猶聞毫

中聲居人云每天風一號四山林木震撼欲折黑雲下罩查不知昏曉歲多投龍者其多驗如西潭復北折而西泝潭之源登響鐵嶺度紫閣山村人多舍篁葦間有平泉數百畝可耕概傍泐石河又行一里所地名石鼓足頓之蓁蓁鳴越十步至第一潭潭如井睨之正黑投以小石鏘若佩環又越十餘步至第二潭圓如鏡釜面廣而底敞大水驅亂石聚其內迨滿復洩去潭下石壁百餘尺陰不可寘足從其右懸藤墜下至第三潭潭甚深以線縋之下不見底其形方狹而長天向陰常有雲氣從中起疑有蛟龍潛其下人恒以幽悄為病第四潭咸不敢往或以緇圍腰繫巨杖俯崖而瞰潭左右皆楓木其形大槩如第二潭而廣袤倍之側有晉劉龍子墓相傳龍子嘗釣于潭得驪珠吞之化龍飛去後人為壘石作塚

或云龍子之母癸馬世遠不可辨又其下至第五潭即東潭因其水五級故名之為洩云噫造物之委形山水者其奇峭有是哉

尚節亭記

劉基

古人植卉木而有取義焉者豈徒為玩好而已故蘭取其芳讓草取其志憂蓮取其出汙而不染不特卉木也佩以玉環以象坐右之器以敬或以之比德而自勵或以之懲志而目警進德備業於是乎有裨焉會稽黃中立好植竹取其節也故為亭竹間而名之曰尚節之亭以為讀書游藝之所澹乎無營乎外之心也予觀而喜之夫竹之為物柔體而虛中婉婉焉而不為風雨摧折者以其有節也至于涉寒暑蒙霜雪而柯不改葉不易色蒼蒼而不變有似乎臨大節而不可奪

之君子信乎有諸中形於外爲能踐其形也然則以節言竹復何以尚之哉世衰道微能以節立身者鮮矣中立抱材未用而早以節立志是誠有大過人者吾又安得不喜之哉夫節之特義大易備矣無庸外而求也草本之節實枝葉之所生氣之所聚筋脉所湊故得其中和則暢茂條達而爲美植反之則爲瞞爲液爲癭腫爲摻屈而以害其生矣是故春夏秋冬之分至謂之節節者陰陽寒暑轉移之機也人道有變其節乃見節也者人之所難處也於是乎有中焉故讓國大節也在泰伯則是在季子則非守死大節也在子思則宜在曾子則過必有義焉不可膠也擇之不精處之不當則不爲暢茂條達而爲瞞液癭腫摻屈矣不亦遠哉傳曰行前定則不困平居而講之他日處之裕如也然則中立之取諸竹以

名其亭而又與吾徒遊豈苟然哉

畏所記

胡翰

常山邑丞劉彥英嘗自溧水辟地抵吾發數過從論學及領邑事又數於衢郡見之問語余曰吾於世無所取長自家庭子弟從師受學長而服官政阨牒四方恒若弗勝也弗逮也人以吾爲畏焉吾念之固然計吾得者以畏也失者亦未必非畏也因名其室曰畏所願乞記於下執事余謝不敏今年聞余病且免歸其請益固迺作而言曰君子處天下之至約而不戚服天下之至賤而不愧履天下之至險遇天下之至變而不駭且亂中立而不倚內省而不疚惡乎畏也苟得志雖富且貴焉當大任於廟堂之上決大議於人主之前一言定國不變色而利澤加於民若舉而措之惡乎畏也吾聞之

天體物而不遺人物之生日用之間莫非天命之流行念慮
有一不誠焉言動有一非禮焉雖至隱至微也而人僞參之
天命幾乎息矣操舍之頃存亡之幾也敬怠之萌吉凶之辨
也今君之畏詎不以是乎則吾知之矣以是而畏之唐虞三
代之聖人猶兢兢業業孜孜慄慄翼翼夙夜不能一朝夕寧
也書曰迪畏蹈而畏之也又曰寅畏敬而畏之也又曰抑畏
謙而畏之也皆所以畏天也詩曰胡不相畏小人無所忌憚
不知天者也不知天者不當爲而爲之知天者不當爲而不
爲當爲而不敢不爲之故其畏也非恇怯也非委靡也又非
有操切之者吳天曰且與爾游衍昊天曰明與爾出王君子
知之故無不畏仲尼著其三其致一也余與劉君皆學仲尼
之學者而余恇怯委靡恒患不振竊觀於劉君方兵興時脫

身危亡疾疫之中奉其母夫人以行歷數歲而返于鄉閭高
年無恙不失人子之道一弟三子自爲師友不廢義方之訓
雖仕宦非其志也邑人親之官事不嚴而集其立心行已加
於余矣在易之乾以惕無咎在震以恐致福君何失乎以君
懷恐惕之心求免於戾則非也天下有任重道遠而首肯不
與焉者吾於君之名寔寧不重有警言云

青霞洞天游記

道家所謂青霞洞天者世名爛柯山卽晉王質觀奕棋處在
今信安之興賢里余客信安頗久非有吏事恒願游以乏同
志不果今年夏六月七日龍泉章公三益來按郡乃會諸生
出城南門輿行十里至武坪又數里渡沙步溪又出入篁篠
中十餘里抵山之麓有寺曰寶巖觀曰仙集棟宇皆已剝落

日午熱甚道士具茗列坐久之秋隘猶民家耳道士除道遂
循觀右拾級而上飛梁橫亘通趾頂皆石卷如蝦蟆其下劃
然可居得地如坻者東西深百餘尺廣半之巨木蔽空公與
諸生皆集飄風汎木葉虛徐漫行後先不絕涼滿襟袖如坐
碧雲蒼雪間求昔人之遺刻唐宋以來陸庶錢顛徐霖游釣
諸名輩往往可識其他漫漶雖欲識之不可得然惟庶碑最
古侍者行酒數行已余與客吳思道旁絲石磴登山之脊出
所坐梁石上四顧皆林阜溪湮地行野中東南諸峯矗立蒼
翠晻靄則紫微也最後公亦挾一童登之復坐縱談問道士
故梅巖精舍所在莫有知者日且暮張然有懷質與余皆東
陽人書石曰闕逢執徐之歲有晉推者之里人胡翰入山與
客六人共飲未醉輒去翰記

香溪仁惠廟禱雨記

洪武十有一年夏六月不雨環郡之邑厥田高者巽拆下者
剛燥陂澤既竭源泉不通稼日就槁農民告病郡邑脩禱祀
之禮籲天叩神或應或否而旱熯如故泊秋七月不雨農民
告病益急從政者患之蘭溪距郡五十里其邑旱不爲災踰
邑而西又二十五里爲香溪入其疆則其澤之竭者演而注
其上之焦者淖而沃田間芄芄皆美稼也余爲愕且喜問諸
父老皆曰先是固旱矣農告病矣賴吾司征之長吉安劉君
思忠而免於歉乃六月己丑君率父老禱于里之偃王廟合
百神而享之明日丙寅入蟠山禱于天津廟廟故有大神曰
澤潤曰澤沛蓋司龍者也迎而致之及途而雨越三日戊辰
又大雨猶未洽也七月癸酉君露跣道上禱之益虔明日甲

戊神應之以雨越三日戊寅又大雨吾稼仰之以足靡不就
實是則神之賜也君之貺也吾民戴之每食恨不尸而祝焉
余聞而愈愕劉君非有民社者曷爲而及是哉旣而過友人
之門陳如圭氏吳德璋氏皆曰誠如父老言然不唯寧是往
年禱雨脫我於蕝隆之毒亦惟君懷懷以將事吾懼無以報
之則著爲咏歌之辭而今又重蒙德焉其感而應也灼有徵
徵矣向使吾二人言之人孰信之使吾鄉人言之雖信而未
必深也今先生幸辱臨茲土而寓目焉咨及下走走不敢隱
懼余言不足以侈君之貺不於先生圖之而孰圖之先生苟
不鄙夷得託諸文字庶其傳信矣乎余謝而退他日童良仲
至郡則具其事以請春秋譏不閔雨而著喜雨善其有志於
民也今郡邑猶古侯伯之國從政者孰不有志於民寧風旱

逢時雨凡禮之所當爲者悉致力焉而猶莫能致其所難必
劉君一司征耳其職不過權貨財督稅課取諸商賈之類與
郡邑有民神者異矣顧不忍農人之無稼殫厥心而拯之天
亦輒應之豈有他哉宇宙分事卽吾分事昔江西陸子嘗有
是言君固習聞之矣况其近者一視同仁而無間可也天之
仁愛吾民恒欲厚其生不幸而丁斯之旱豈使之無子遺哉
故一夫致其格一鄉遂其育積誠之至則天心順成之矣余
取鄉人之言論著君之侯以見喜雨者能閔雨也不臨民而
有志於民尤所善也此春秋之義是宜書之以告來者

開先寺觀瀑布記

王禕

廬山南北瀑布以十數獨開先寺所見者最勝開先瀑布有
二其一曰馬尾泉其一在馬尾泉東出自雙劍香爐兩峰間

爲尤勝或曰瀑水之源昔人未有窮之者或曰水出山絕頂衝激入深澗西入康王谷爲水簾東出香爐峰則爲瀑布也十一月十八日南至余約郡守呂侯肩輿十數里至開先主僧志一作丈室未成邀坐茅屋中乃訪漱玉亭却至龍潭石峽口由寺至亭可二百步由亭至峽口僅數十步蓋自遠觀之瀑布出自兩峰間如瀉天半由近而觀則二瀑下注匯爲重潭潭水出石峽乃爲溪循山足東流以入於彭蠡當峽口仰望但見水從潭中出巖谷回互二瀑所從來不可復見矣峽石上刻青玉峽及第一山字九二尺米芾書也石間多題名石祐字畫淺初不可悉辨命左右掬水沃之字乃見大率宋南渡後人其人無聞者居多可識者纔十二三因慨君子惟植節砥行乃可不朽苟不出此雖托名岩石未久人不

識也又從石壁間讀淳熙中郡守禱雨神龍示現事一公爲余言歲春夏文大雨後瀑水盛潭遠溢積葉墜梗皆蕩滌去不留謂之龍洗潭或載旱人來取水潭中禱龍神輒有應至今常然回坐亭上亭廢已久亭下池亦爲石所堙初寺僧作石雷接潭上引水至寺中給庖湏又鑿石作此池即蘇長公賦詩處也徑八九尺雷水從潭上來流入池乃從池中復入雷以去而石雷廢亦十五六予命一公葺之一辭力弗贖也明年三月廿六日雨初霽郡中又無事復約呂侯及通判羅從道幕賓徐君弼姬執中星子令葛俊德游焉比抵寺諸公皆先詣一公余獨徑往潭下坐石上瀑水方怒瀉奔騰盪激聲震如萬雷令人心怖神悸服戰栗不休頃焉諸君至見余獨坐又顏色變皆拍手呼大笑然水聲湏洞呼笑聲亦不

聞也寺僧云龍適洗潭矣於是一公丈室已完又作竹筧接石甃引水過階除下清駛極可愛余命取水煮新茗一公謂近從後巖下得泉一窪以煮茗味比瀑水乃倍佳試之果然暮乃回六月十日余被召將赴京念人世行止不可必萬一有他累則清游不復得因與郡人段諷曹元同泛過落星湖約得路之半舍舟以行一公與光應知余來遠出迎乃與二僧携手行至招隱橋坐橋上橋在寺前五十步潭水為溪所經也其西東松杉楓杞蒼翠色掩映從樹底望鶴鳴諸峰高出樹杪僅尺許隱然如畫圖中見又從樹隙見巖腰采薪人衣白大如粟初疑此白石耳有頃漸移動乃知是人也橋下流水觸石滌滌鳴塵慮俗想蕩滌殆盡久之不能去乃造一公所眎余其所賦詩又出楞伽經使予讀讀盡卷頓悟微旨

一二應公者戒行清峻略涉書史年且老不欲他走一公邀留與同處郡中亂後無讀書人可與語余因數與往來一公請予詣潭下是時久不雨瀑布流且絕余指筧中水謂曰此水一耳何必復往也是夕宿寺中夜半雨大作比曉余未起應扣門告曰瀑布流如故矣盍亟起觀之余欣然攬衣起倚闌睇視良久曰初出紅光徑照香爐諸峯上諸峯紫靄猶未斂光景恍惚可玩不可言也應因誦李太白觀瀑詩又誦笑隱題太白觀瀑圖詩余笑曰安知今日無太白邪胡可謂古今人不相及也比午乃還一公間為余言開先者舊傳梁昭明太子之所棲隱南唐元宗在潛邸亦嘗讀書於此招隱橋其所造也後歸踐尊位乃即此造寺故以開先名有丫巖和尚者實開山宋以來住山者皆名德寺前有松每株大數十

圍佛印元禪師手所植近時南楚越公乃盡伐以建寺見者
惜之而寺今亦爲劫灰矣豈非數乎一之居此所願圖復其
舊而適此大法陵遲有志未遂幸文室苟完聊安餘息而已
公尚丐我一言以記之吾之願耳余諾之未果爲也

游白鹿洞記

余到郡已數月欲至白鹿洞甚渴左右爲余言往時荆棘塞
路不可往頃因伐大木往者衆路乃始通然路上虎縱橫苟
欲往非多擁騶從不可用是欲行輒復止會行省荐檄郡府
取大木余因挾星子令及都昌主簿彭能領丁夫與同往去
郡北行十五里至羅漢寺路分兩岐由東入棲賢谷西則至
白鹿洞也比至兩山勢回合當其合處澗水出焉過澗逾小
嶺嶺有缺若關門然入關路循澗北並山轉澗南皆良田也

約二三里乃至書院遺址正當五老峯下書院燬已十五年
樹生瓦礫間大且數圍前有石橋曰濯纓其左又有石橋曰
枕流過枕流則從列女廟登北岡岡上有大杉木六七百年
物也有司今盡伐爲御殿物矣於是書院所存者獨此二橋
從卒指殿堂齋廬及風泉雲壑樓故處以告甚歷歷慨想昔
日規制不可見惟聞山鳥相呼鳴山谷虛餘韻悠揚恍類弦
歌聲或云從此右折東南逾重岡行二三里乃至所謂白鹿
洞却從洞後復右折陟嶺乃可到尋真觀望水簾也不果往
徘徊久之而還按白鹿洞唐李勃讀書處也南唐昇元中始
卽其地爲學給田以食其徒所謂廬山國學也宋初天下未
有學惟有四書院睢陽石鼓岳麓及白鹿洞也太平興國二
年嘗賜白鹿洞九經當時學者數百人至崇寧末乃盡廢及

淳熙七年考亭朱文公爲郡始斥其舊而大之又定爲學規示學者來學者益衆而白鹿洞之盛出他書院右自後守其成規二百年如一日也而蕞廢今乃如此余亦無如之何也余嘗恠世之爲佛老氏之學者其宮室一廢壞輒脩舉之不旋踵豈佛老氏之學能盛於儒者哉蓋爲其徒者有勤行之意堅持之操能必其成故也至於世儒習聖人之道常骯骯不自振不能以有爲而聖人之道願因委棄鬱塞而不得行嗚呼此其弊也非一日之積矣余於是蓋重歎之也

自建昌州還經行廬山下記

八月余自京還九月以事行郡境二日泛左蠡揚瀾至都昌縣四日由都昌出彭蠡過飄搖沙宿蘆潭五日至建昌州七日回至蘆潭北風作舟逆風不可行八日復至建昌九日舍

舟取陸而還是日宿德安縣十日發德安西北行三十里至廬山下訪湯泉湯泉在路南距山趾不半里麓石爲池者五南一池極熱手不可探北四池水稍溫人往往入其中浴然皆作硫黃臭余舊聞凡湯泉下必有硫黃惟驪山者下乃是礬也礬毒石本草云惟熱入水水不水蠶食而肥用食而死也又數里遇醉石觀陶靖節故居其地果里也地屬星子縣而星子在晉爲彭澤縣觀已廢惟有大石巨澗中石上隱然有人卧形相傳靖節醉即以此石上也按史靖節爲彭澤令督郵行縣吏白當束帶見之靖節不肯折腰小兒遂解官賦歸去來辭而歸義熙三年也是歲劉裕實殺劉仲文將移晉祚陶氏世爲晉臣義不事二姓故託爲之辭以去若將以微罪行耳梁昭明謂耻復屈身異代要爲得其心夫豈以一替

郵爲此悻悻乎靖節既歸益放情於酒人知其樂於酒而固莫窺其所以然也或云觀南諸山即其詩所謂悠然見南山者也其有居民多陶姓云是靖節後又數里爲簡寂觀觀亦不存簡寂者陸脩靜謚慧遠法師之結白蓮社也同社者十八人陶靖節陸脩靜皆與焉遠公居東林在廬山北靖節脩靜嘗訪之東林之近有虎溪遠誓不過溪或過溪虎輒鳴及送二人不覺過虎溪皆大笑世故相傳爲三笑圖或曰慧遠卒於晉義熙十二年丙辰年八十三脩靜歿於宋元徽五年丙辰年七十二丙辰相去七十載推而上之脩靜生義熙四年丁未慧遠亡時脩靜纔十歲爾至宋元嘉末脩靜始來廬山時遠公已且三十餘年靖節死亦二十餘年矣安取所謂三笑乎或曰晉蓋有兩脩靜也自蘇長公作三笑圖贊而黃

太史以此三人實之蒲傳正劉巨濟晁無咎之流皆有所述陳舜俞廬山記其說亦與太史同此其是非固未決者也又循山下西北行未至郡治二十里爲歸宗寺在金輪峯下山勢方疑然忽石峯從山腰拔起如卓筆高與山齊峯頂有舍利塔俗呼爲耶舍塔釋氏書云佛滅度後所遺舍利八萬四千散在人世龍宮皆貯以金瓶寶篋建塔藏焉東晉時耶舍尊者自西域奉設利來八萬四千之一也於此建塔塔高若干尺範鐵爲之外包以石峯峭峻鐵石重人力不可施皆運神通力致之俗故呼爲耶舍塔耶舍亦與遠公社嘗舉如意無言以示遠遠不悟即拂衣去是時禪學未入中國而地則已此見矣耶舍之去逕上紫霄峯紫霄又在金輪東也寺相傳爲右軍故宅有池水色黑曰墨池羲之所洗墨也羲之

嘗慕張芝臨池學書池水盡黑此為其故蹟豈信然邪今臨川郡城東有墨池南豐曾氏為記蓋深疑之以謂方義之不可強以仕而嘗極東方出滄海以娛意於山水間豈其徜徉肆恣而又嘗自休於此邪余謂以彼之可疑則此之不足信非邪宋元豐間真淨文禪師住歸宗時瀘溪周先生自南康歸老九江上黃太史以書勸先生與之游甚力以故先生數數至歸宗因結青松社若以踵白蓮社者又名寺左之溪曰鸞溪以擬虎溪其事為釋氏所傳世皆謂先生實傳聖賢千載不傳之統豈其有取於佛氏之徒而願從之游甚者又謂瀘溪之學受於壽若佛者此又厚誣吾先哲者也余以為不然大賢君子於其道既有得矣於其形迹未嘗以為累也况先生之高致如光風霽月初無凝滯固奚必深辯之邪及

淳熙中應菴華禪師繼主歸宗未夫子時為郡亦嘗與之游華公蓋臨濟正傳於大慧為適孫歸宗雖非巨刹以屢為名僧所居號天下歸宗今寺亦廢故基為樹所蒙蔽不可入予徘徊鸞溪上甚久日已暮遂復行數里宿開光寺明日乃還

游棲賢院觀三峽橋記


五老峯於廬山為西面即鄱治北望峯如屏障蔽其後遠郡治北行二十里轉五老東入巖谷中棲賢寺在焉余舊讀蘇次公棲賢寺僧堂記云棲賢谷中多大石岌巖相向水行石間其聲如雷霆如千乘車行者振掉不能自持雖三峽之險不過也故其橋曰三峽度橋而東依山循水水平如白練橫觸巨石匯為大車輪流轉洶湧窮水之變寺據其上游右倚石壁左俯流水石壁之趾僧堂在焉狂峯怪石翔舞於簷上

每大風雨至堂中之人疑將壓焉問于習廬山者曰雖茲山之勝樓賢蓋以一二數矣又聞蘇長公云廬山奇勝處不可勝紀獨開先漱玉亭樓賢三峽橋爲二勝樓賢寺於是廢已又殘僧數輩皆出居田間左蠡有僧曰惟賢頗通世間法余謀於府僚俾之住樓賢賢曰俟吾結屋山中完公當來游也七月望賢使來告曰屋幸完可游矣明日卽偕呂侯旣爲君往時暑甚輿夫賜屨從道傍石坎中掬水飲至谷口日卓午矣未至橋十許步后巖下觀陸羽泉乃至橋上從橋上俯視澗底亡慮百千尺或云以瓶貯水五升許從瓶背中出水縷縷下注瓶竭水乃著澗底欲試之不果又云橋曾班造蓋謂堅緻壯奇惟般乃能造耳非謂真造於般也距橋北十許丈有大石方整狀如棺橫亘澗底相傳嘗有孽蛟從谷中出水

怒湧勢將壞橋時主僧有道人叱神挽此石扼之蛟退橋得不壞過橋北轉行百許步澗水至是匯爲深潭有龍蟄焉蘇長公詩所謂玉淵神龍近卽指此也又相傳昔寺僧嘗浸甌潭上俄矢所在後有人從湖南來云甌從洞庭湖上出甌上有樓賢字可驗故知此潭下通湖南也此其言皆誑誕不足信已乃徑造賢公新屋下法堂故趾也至是五老峯乃巖然左出寺願在峯後日方熾忽雲從谷中起俄頃雨已至有風南來雨復旋散日光穿雲斜照峰上巖谷石濕芒采相射宛然金芙蓉也賢公留余宿約明日謁赤眼禪師塔塔距寺北行又十許里巖谷深絕處也樓賢寺實禪師所創道場余辭與葛公先歸而呂侯乃獨留賢請余重書蘇次公僧堂記余謝不善書又欲余和長公詩余謝不工詩則題游山歲月氏

名遺之以附昔賢故事按次公以元豐三年夏六月來游時
謫官往高安而長公至此則七年六月時自黃移汝送子邁
赴饒之德興尉云

皇明文衡卷之二十九終



皇明文衡卷之三

記

謁周公廟記

王禕

洪武辛亥春余還自西番以閏月二十五日戊寅至岐山縣
明日謁周公廟廟去縣十五里出城循澗水西北行至山下
乃折入山之腹而廟在焉至是四面皆絕壑峭壁其間平地
東西僅五六十步南北如之而稍脩形勢殊幽阻廟東北十
數步有靈泉出巖石間即澗水所從出也廟之建莫詳其所
自始按碑記唐太中二年鳳翔府岐山縣鳳棲鄉周公廟出
靈泉則廟祠在唐之前當已有之金興定五年有道士市其
廟作道官縣令李守節正其罪鳳翔府錄事判官游淑記之
甚悉元初廟盡廢至元十七年李忠宣公德輝行臺陝西欲



起其廢而有司力不逮乃請終南重陽宮李天樂真人重建
既成其徒就守之今廟是也厥後陝西部使者李木魯神言
周公先聖在唐與孔子同廟祀天下今乃令道家者流主祠
事非所以崇聖道昭禮典若立書院俾儒者主其祠爲宜元
統三年命下如所言賜額曰岐陽書院始置學官弟子員春
秋致祭禮如祀孔子元末天下亂儒者皆解散書院燬于兵
廟幸獨存而今守祠者仍爲道士矣廟始未可驟見者如此
其廟中爲正殿奉周公東西二小殿以奉太公召公東北別
有小殿奉姜嫄凡廟之儀與冠冕佩服之制皆粗鄙不合禮
又正殿前有戲臺爲巫覡儺伶之所集而殿中列以俗神野
鬼之像尤極淫恠余因嘆曰周公制禮作樂以憲萬世其沒
實記以天子之禮樂今其廟制乃若此世人不知禮一至是

乎不特此也以余考之周公之稱因以太王所居周地爲其
采邑故也水經岐水之南有周城周公采邑也杜預云周城
在夷陽縣西北帝王世紀云周太王所徙南有周原也周城
今爲岐陽鎮其城故址猶存廣袤可七八里四圍皆深溝實
在今岐山縣東北五十里正太王所居而周公食采之地也
然岐山縣西北十餘里其地曰周公邸地形頗平衍意者周
城乃公采邑而其居邸則在此歟或乃謂今朝爲周公故所
居地且其址既阻隘路衢尤險狹周公以家宰之尊何得而
居此殆後人即此建廟故遂繆指爲公所居位耳而近時暢
師文作記謂周公采邑廟即其地者非也舊碑載大中二年
十一月一日周公舊祠有靈泉已枯竭一夕大風其泉五處
一時湧出守臣白鳳翔隴州節度觀察處置等使銀青榮祿

大夫檢校尚書左僕射兼鳳翔尹御史大夫安平郡開國公
食邑二千戶崔珙奏其事朝廷因賜名潤德太中乃唐宣宗
年號崔珙所帶銜位正唐制而其表奏制荅等文又唐體而
近時孔克任作記謂為宋大中時太守珙者亦非也世傳靈
泉每世治則出世亂則竭故眉山蘇文忠公詩有與世窮通
之語自唐太中二年出後復竭至宋雍熙二年復出金末
復竭及元至元十七年復出其後復竭而復出於今其出也
所灌溉甚廣人賴其利舊碑載大中二年賜名潤德而湘山
野錄以為雍熙二年賜號要當以碑刻為是是日從余行者
儒士安矩季方詣廟拜謁畢出坐外門荒墟上道士持酒來
餉為飲數小卮適雲陰雨微下風起撼群木響獵獵如秋聲
恍疑風馬雲輿來泣者因低回久之乃去比回縣館以廟制

與禮不合者語其令李本初屬其稍皆釐革李以縣事繁劇
辭余不復與言而具疏其本末及前所云云者紀之於簡以
遺矩用志歲月焉

寫易軒記

去淳安縣治北五里山巒迴合其地曰石峽有方氏之居焉
方氏在宋季有以倫魁致位禮部尚書者學者稱之曰蛟峯
先生宋亡堅卧不起而推其所學以泐諸人因即其居為書
院尚書之曾孫以愚實世其家學且蚤擢世科仕郡縣入為
太史屬當運去物改之餘亦復遂其高節而無媿又去石峽
北五里珠佩峯下結屋居之去人境益以遠學徒有執業來
受教者弗拒也此其進退出處庶幾有合於易道之時中者
乎太史晚益好易嘗即寫易之軒而以寫易名之禱之先大

父昔嘗主教於書院交方氏也久於是太史以契家故屬禱
爲之記昔者竊聞之易之爲書廣大悉備四聖人精神心術
之所寓者何其微也然而有先天之易焉後天之易焉要其
盡卦重卦之義固不同也是故陰陽奇耦積成三畫而爲八
卦此先天之易也故曰太極生兩儀兩儀生四象四象生八
卦是書卦者積陰陽奇耦三畫而始成也八卦之三畫既以
成列復重以本卦之三畫而有上下二體既又相錯相盪而
六十四卦互成焉此後天之易也故曰兼三才而兩之是重
卦者八卦之上復加八卦而非三畫之上適加一奇一偶爲
六畫也邵子之圖以乾六至剝坤爲卦之次第雖與易經不
合然實自然之序若其所謂八分而爲十六而爲三十二而
爲六十四者斯益使人觸類而伸之以見易道之無窮而申

卦之義不在是矣然吾朱子乃有取於是焉則後學之不能
無疑者也雖然盈宇宙間皆太極之妙而人物得之以各正
性命然則易固我之所自出者也故求易者在乎內反諸心
精體而實踐之以會夫體用之一原顯微之無間固不必惟
文字之爲泥也邵子之言曰先天學心法也萬化萬物生乎
心也此固易之本而聖賢之所謂學者歟太史之居於斯也
觀象而玩占心之所契必有得於文字之外者而余何足以
知之姑疏所聞以求質請遂以爲記焉

新鑿惠澤池記

杜敷

潞爲州屬縣六壺關西距州治僅一舍域太行麓地高亢土
峭剛而獨闕井泉利縣郭民會有力者掘井深倍九仞往往
爲石隔而不及泉間或及之水脉津津及挹會弗滿瓶其勞

於遠井直抵州境洎他聚落乃至積雪窖鑿冰壑給旦夕用以故其民不免有饑渴之害者洪武丙辰閏九月三山郭公來丞是縣興利除害政教以行憂民渴饑不啻猶己越明年丁巳春正月乃會羣吏屬耆衆而謀曰縣治南關故池爾衆向集雨潦第以漑衣飲畜今湮壤淤塞棄同無用我將卽農隙借民力是鑿是浚候雨西郊齋泊泓澄惟供飲食可乎衆乃舉手加額同口一辭曰何民生之幸於是上於州司而允其請乃卜日召集近縣郭民奮鋪齊興不旬日而池成其濬則護以木柵而防崩齒之患其岸則繚以垣墉而限汗穢之雜坤隅爲闌兩壁翼張而鏤板橫施俟大雨流行則起之以石硤注瀉而入水良隅爲門兩楹山峙而倚鑄堅設令衆人汲澗則開之由石級下上而出水廣則呀焉窪焉廓具有容

始如天造地設深則瀆然混然昧其不測宛若陽關陰闔於以免往復遠汲之勞於以憫饑渴燥吻之思衆請其名則曰惠澤蓋取語云因民所利惠而不費之謂嗚呼旨哉嘗稽易大象澤無水則曰困澤有水則曰節夫澤水有無其卦則爲困爲節猶池之廢興其水則爲潔爲湫今池轉湫爲潔猶卦反困爲節旣變通以盡利復推行以爲通乃因天之澤爲地之澤以地之澤爲民之澤公可謂能體易以利民者矣且古之爲國者惟水事爲重故有障大澤勤其官受封者公旣破大其量淵深其學由是將爲州爲府而登庸於朝澤加天下則惠利所及其源深其流長而可以涯涘哉縣南坊耆衆其輩請文刻石而紀功績以示永久俾勿替公名栢字求齡由進士擢濠陽簿今爲壺關丞

華川書舍記

趙汭

婺州義烏縣有澤曰華川王君子充書舍在其上同門友宋君景濂歷敘上世以來爲文者之失得而卒歸於聖人以爲記辯博精詣殆不可加矣邇者汭與子充相見於錢塘子充又俾汭申其說旣不得終辭則以復曰聖人之文非一家之言也昔者成周盛時帝王制作大備其載諸方冊以垂軌當世者謂之經若韓宣子適魯所見其類矣詩采諸民間策書辭命職在史氏未嘗使學者執筆習爲之也吾夫子順先王詩書六藝以設教而學文之訓門人識之亦曰考觀聖賢成法以盡其職分所當爲者而已蓋自一身以達天下彌綸益著而非外求由小學以底大成品節愈嚴而無二本成德達材之衆率由於斯而徒以文學稱者非聖人意也是故夫子

嘗刪詩定書贊易修春秋以爲萬世明法而必曰述而不作曰吾從周則豈以言出於口者謂之文哉戰國爭彊道術分裂則一家之言興而異端起矣自茲以來吏治不足繼以武功而爲國者始思息民以黃老經義未明流爲箋疏而反身者唯知洗心於釋梵由是馬班崔蔡之倫以文名家凌厲縱橫浩不可遏而先王經世之術微矣賈誼董仲舒掇拾於殘闕而莫之行諸葛孔明范希文鞠躬盡力而未足以有明也春陵河南大儒繼作然後二帝三王所相傳授者始煥然於時關中張子因之崇執禮之教精思以致道修辭而斷事以一鄉而準天下考三代以示方來卓哉學者之楷模矣迨新安朱子繼周程之緒大明經訓以覺斯人而浙河以東若呂薛二鄭氏取周公舊章離析錯綜如示諸掌學者於斯得窺

見聖人制作之盛焉然當是時陸子靜氏起於臨川以其得於心者行乎家邦充然自足而諸君子之志荒矣薛鄭會歸於朱子而呂氏則無間然陳君舉薛之徒也乃自以書請益於陸氏此又論先哲於鄉土者所宜慎思而明辯也况夫有志於斯文者乎子充早受業於同郡學士黃公黃公之見於文章者岳靜淵澄不大聲色固非欲以言語文字名世而子充明經潔行卓越不羣因鄉先生精神念慮所存以端述作之本原極古人之能事必有徵矣則雖俯仰一室而所以系吾徒之望者何可量哉浙東多文獻故家他邦莫及昔予嘗欲往遊而未能異時考德會文之樂舍華川奚適乎

共學齋記

后王降德之道不明士君子能反諸身以爲學者千百年來

大略三變以復于古而異端不與焉處汗濁之世不忍自同於凡民而又患夫資之不足也於是乃有佩韋弦以矯偏運甕枕圓以驚惰晝有所爲夜必焚香質於神明念慮善惡之萌必察焉而各以其物識之以觀其消長蓋動心忍性不如是不足以有立於時則自知也亦明矣於是有君子者出主忠孝以飾其躬以匹夫而立師道使在三之義赫然白於天中後有作者不敢忘焉其視專一善名一行則又遠矣於是又有君子者出以其得於天而成詣已者本經訓以叙斯人使先傳後倦之教下學上達之旨復明於世蓋秦漢以來學術多矣至是始歸於大中可謂罔極之恩矣自其教行高明特達之士翕然歸之然其間善學者乃復因其性之所近端居默識以極夫反已致曲之功而後傳之無弊則君子之學

夫豈易言也哉。訪學於古人而未之能進，竊懼夫氣昏力薄，不足以底于成。迺題山居讀書精舍之西室曰共學，與同志者居而勉焉。噫！人固與庶物並生者也，苟無以反之，則情熾利害之間，將無以自別。矧學不至於知至而意誠，其氣機之竊發者，每起於芒忽而天理之存焉者寡矣。彼憤悻堅制高邁卓絕以自拔於凡行者，亦何可少乎。易曰：智崇禮卑，智崇效天禮卑，法地聖賢之言無二致也。羣居終日而義有不出於此者，何足道哉。乃書之以爲共學齋記。

櫟軒記

鄭之恒僑居黔水之南，烏聊之北，題其隙宇曰櫟軒。其言曰：櫟不材木也，無所可用，是以能終其天年。吾聞之莊生云：居無何，大夫士爲詩文以釋其名，軒之義者甚衆，言人人殊之。

恒不憚以其間日之黎陽山中見支離無謂而問焉曰：吾以櫟名軒，而人鮮能喻吾志者，言之輒異，何也？支離無謂曰：子無惑乎！人言之異也。世之所重者材也，而子獨以不材稱材之所貴者用也，而子獨以無用全子。無惑乎！人言之異也。雖然，生之有壽，天豈材不材之謂哉！深山之楸枿、豫章、闔千百，年未有過而問者，道旁之樗櫟未拱把而夭於斧斤，其所託者不同也。夫櫟之不材，猶樗也。櫟以社而存，猶樗之以神也。社有變置而舉，或廢之，則樗與櫟豈能自全耶？謂不材之木獨能終其天年，非莊氏意也。彼莊子者，悲夫世俗之士以材爲累，不若不材者之無用也。故爲是不得已之言，又悲夫不材者亦有時而不得免也。將自處於材不材之間，然材不材之間似是非，猶未免乎累也。則夫可以害生者，豈惟材哉！

邦君之於國也聖哲之於名也皆累也彼且欲曾侯洒心去
欲而游於無人之野使仲尼辭交游去弟子而逃於大澤其
憂患乎一世者豈有涯哉嗟夫亂世多害智愚賢不肖俱困
而莫知除其憂此夫人所深悲而非爲一己之私也子之不
材自處豈其意邪甲然則莊氏昔所謂者非邪支離無謂曰
莊子固嘗言之矣其所保者與衆異也且子亦嘗聞所謂物
之初者乎游於物之初則不物於物不物於物者益之而不
加益損之而不加損天地遽廬也古今一息也死生夜旦也
虎兇無所措其爪甲兵無所容其刃無傷於物而物亦莫能
傷也是豈材不材之論哉雖然爲櫟有道卽子之居行子之
志使董梧無所用其助而舍者爭席則材不材皆不爲子累
矣又何恤乎人之言鄭之恒嬰然而起釋然而悟曰善哉進

於道矣雖然吾於櫟有取焉請書是說於軒中以爲記

梅花易洞記

徐一夔

山陰胡君龍臣居越王山下環其廬植梅數十百株而日
居其間讀易因名其處曰梅花易洞且曰昔五峯胡先生讀
易巖廬自號易洞吾名亦奚不可然客來輒不解曰甚矣胡
子之欺人也大山長谷穴而爲洞嵌空哈呀其上穹然而蓋
覆其旁屹然而壁立其中廓然而有容蛇龍居之虎豹藏焉
此洞也若五峯先生讀易之地似也今子雖依山爲屋所謂
嵌空哈呀之狀無有也其屋規模不廣制度不華覆蓋其上
者獨其枝若屈鐵之交錯其花若晴雪之燦爛所謂穹然屹
然廓然者亦無有也非洞而曰洞甚矣胡子之欺人也余乃
爲之解曰獨不觀之儒先之圖乎天地亦一洞也豈直居室

哉何也乾南坤北一上一下陰陽之宅也離東坎西一闔一
闢陰陽之門也巽承乎乾而位西南震交乎坤而位東北陰
陽之所以終也陰陽造化生生不息如循環然昔之至人心
與造化遊嘗言弄環餘暇時性時來蓋以天地爲一環矣夫
洞環類也環非實環洞豈實洞哉是意也五峯先生知之矣
胡君慕先生者也豈以弗知而欺人哉余竊聞之聖人作易
本之陰陽見乎卦辭學之者將以見夫用善觀物者卽微而
知著卽小而知大卽近而知遠自一室而至於天下自一日
而至於四時自一呼一吸而至於十二萬九千六百年吉凶
消長之理進退存亡之道莫不悉備胡君誠有以知之無自
善其身請以告我

梁氏書莊記

梁寅

余山巖之士自少而好文籍迨乎中年稽古之益久窺道之
頗的則又因多暇而好論著夫躬行之士不務於立言然恥
沒世而無聞亦往往藉是一今朝之初共承一明詔陪諸搢
紳議禮制獲觀大常所藏書迨歸田野十五六年之間索居
無所爲因思託之言以傳來世前讀程朱易以其釋經意殊
乃融會二家合以爲一謂之易參義於讀春秋也病傳之言
異求衰賤或過乃因未予之言唯論事之得失謂之春秋攷
義及歸老之後於書也以蔡氏傳之詳明而姑釋其略謂之
書纂義於禮記也以其多駁雜唯取格言以類而分謂之類
禮於周官也芟剔其註使其明暢謂之周禮攷註於詩也因
朱子之傳演其義而申之謂之詩演義又稽之經史以待策
問謂之策要凡羣書之言則取其精粹申以己意謂之論林

憫時俗之失則縱論古道略示勸戒謂之羣言憚諸史之繁則撮其大要易於覽聞謂之史略復晉類集古之格言芟取其要謂之類訓是諸書者或刻之以傳或繕寫以藏暨凡所得書皆聚之一室故號書莊焉蓋曰家之恒產寡薄使子孫能守是莊亦足以贍生非徒夸其多而已也凡人之生世必有裨於國必有益於民故爲公卿爲百僚爲將帥爲守宰又其下爲胥吏卑謀爲農工商賈皆不徒衣食必資其心與力以爲衣食焉吾爲士者乃衣食於人心不勤力不悴非救民者耶所謂莊者田舍之稱也杭稻菽粟之所藏也吾無田以獲杭稻菽粟而所藏唯書子孫守焉無租稅無科需而學之成也又足以應上之求替時之治是吾之不念子孫立產業乃所以深念夫子孫者嗟夫山之爲石者有銀之礦而綠生

焉有鐵之礦而朱生焉然則家之有書而後嗣之能學亦理之然也若夫有書而或怠於學者人也學之成而祿不及者天也爲子孫者又當盡乎人而聽之天可也

隘齋記

徐尊生

歙南洪節夫曩家小飛來峯下其先廬相去十里而近在杏坑之原故無恙也壬辰之變悉燬于寇越二年擾稍定流散來歸節夫以小飛來直通衢而其寬閑深阻可以肥遯者莫宜杏坑之源乃卽遺基去其蓬蒿瓦礫爲茅屋若干楹奉母夫人以居敕諸子肄業其間材樞而制庫視昔日棟宇之壯丹刻之華無復得其彷彿而意趣幽野位置整雅望而知其爲隱君子之宅也扁其燕處之室曰隘齋而謂友人徐尊生曰予平生不能媚世俗物亂離顛沛以來益齟齬於時矣故

因吾室之隘以自名以見吾志蓋爲我記之尊生辭不獲則復于節夫曰道以中庸爲至人鮮能之得其一節之偏以高於世蓋已難矣若夫厲廉隅飭名檢波流風靡之中確然有所不爲則隘者豈非制行之高者歟方瀕洞之秋衆人眩惑搖動往往有之君獨矜然不滓倡勇效順旣乃屣脫功名深潛遠引於巖石之下非夫居常有得於隘而能遭變不可奪如是乎且吾聞之合於人心之公以爲隘則固制行之高者也任夫一己之私以爲隘則其弊有不可勝言也毫釐之間辯之弗審而善惡之歸相去遠矣古之隘者無過伯夷鄉人之冠不正則不能與之處讓國恐不遂其志則逃諫伐以不聽其言則隱而餓餓而死其隘如此然其所爲皆關乎世教之大合乎天理之公朱始以己私參焉孟氏立論之嚴雖以

爲君子弗由而又推尊之曰聖之清故爲隘者必以伯夷爲標準庶幾其可伯夷奮千百世之上吾從而興起於百世之下人心之公無古今無今欲爲伯夷是亦伯夷而已矣以節夫居常遭變而不可奪觀之則辯之庸有弗審乎雖然弘道在人能大其所受斯謂之君子伯夷之行可尚已比之中庸之道有間矣由伯夷之行合乎中庸則我廣大盡精微粹然無疵而所謂隘者將不可得而指名矣君子之於道豈固以偏自處而不舉其全哉詩曰德輪如毛民鮮克舉之吾於節夫深有望焉

朱氏春濡菴記

朱廉


義烏朱資安居縣南之剡溪旣葬其親於所居東北之五里杏花溪之左乃築守塚之舍而署其名曰春濡菴春濡云者

蓋取諸記禮者之言資安以告余俾爲之記余曰善夫資安之爲何其可羨也墓有舍而歲祭之士大夫行之久矣胡獨有羨於資安也嗟夫三代之世教化明備禮俗興行人自幼稚已知事親之禮矣及其既長孝養之外他無事焉務以適其志務以安其躬務以善其甘旨而致其尊榮惟恐親之弗悅也旣已如此矣又懼其不可得久也惴惴焉而愛其日不幸而沒則吾哀戚之至若不欲生葬理必盡其禮而尸祝必竭其誠終其身而弗怠夫然故爲人親者生則享其養歿則享其祭而無憾焉迨世教衰士習益下甚者視其親猶塗人其口能言也而未必聽其言其色可見也而未必視其色况能視聽於無形無聲也哉此其人蓋與夫羽毛齒角者不異其事生若此豈復有沒後之恩而致其愛敬於墟墓之間哉

今資安之思念其親吾想其心入其室則惕然感曰此吾親所構也吾今安居之而吾親安在哉稼其田則曰此吾親所闢也吾得粟而食之而吾親安在哉涉其園則曰此吾親所築也吾得藝吾麻而吾親安在哉觀其妻子則惻然以感曰此吾親之授我以室而延吾嗣也觀其兄弟則曰此皆吾親之子而吾同氣也視其身則曰此吾親之遺軀幼而育長而教以望其成者也今吾與其兄弟妻子具在而吾親不可復作終吾生不得見矣一念之感未嘗不太息流涕不能自止况夫氣序之推移時物之變易徂暑未幾而繁霜已肅改歲未久而雨露已濡徬徨丘隴之間戀慕松栢之下一觴一馘庶幾享之其情爲何如哉此其視流俗何如而余烏得不深羨之哉况又徵文於予將刻諸石以圖永久是不獨盡其一

身之孝思且將使其子孫繼續於無窮尤有過於人者余故
為書之俾世之弗及者有所興起而後亦毋敢怠忘也資
安善事其兄卽余向時為作義軒記者

皇明文衡卷之三十



皇明文衡卷之三十一

記

遊三門記

王翰

三門集津在平陸縣治東六十里道由東西延至黃堆循河
東下再行十里至其處河南山脊峻下其尾屬於北山鑿山
作三門以通河流南者為鬼門中為人門次北為神門又次
北及開元新開河又以中為夜叉門北為金門新開河為公
主河未詳其說也鬼門迫窄水勢極峻急人門水稍平緩直
東可十五步中流有小山乃其底柱也東又十步其水營迴
請之海眼深不可測神門最修廣永安蓋唐宋漕運之道
山崑上有閣道且牽泐石深尺許正南下五十步有石聳起
側視若香爐然東又三十步一峯可高數丈不甚奇新開河

南北廣約計二丈其岸石如甃又直如繩取者行百餘步與神門水合其南一峯壁立度二百尺許極奇秀石紋青黃相雜其巔多鵝鸛巢壘石爲爐形非飛舉者不可至不知其始有人謂老君煉丹爐蓋以神之也新開河左就崑石下刻宋金人題名并詩且刻翠陰禹功二崑稍東刻忠孝清慎四字字畫若顏魯公書者其南山上有石巉然如鷗蹲者人號爲樹鼓石蓋禹用以節時濟力也自新開河東口涉水上山上舊有開化寺今不存有小祠象龍神者前碑剝落不可模不知何時立祠檐下二石其狀如碑無字上作三竅一碑蓋金源興定十二年脩禹廟之記也回至西可二里上山謁禹廟而還所至處皆用小律詩記之偕行者生員張恭馬喜王興也時洪武十七年二月二十八日記

古愚齋記

劉永之

臨江貳守韋侯彥芬其系出於漢丞相昭由丞相四十七傳而至茂今家潤州雲陽爲其邑之著姓出郭門若干里地曰壽安有別墅者侯之所建也蓋嘗讀書其中而題其齋居曰古愚其至官也手書其事以遺永之而求文以爲記旣受命乃爲之說曰言非一端而已卽其言而知其志之所存所謂知言也蓋是今而非古久矣有行古道於今之世者必且群起而訾之曰是好古而愚者也夫古之道豈誠然乎哉亦失其好惡之情焉耳方周之衰天下蓋已弊矣繼之以強暴之秦盡去先王之典而用其一切之法使其靡靡然戕其仁厚之性而從事於貪殘刻薄變詐之行於是是非好惡顛倒錯謬一反其情以至於大壞極亂不可救過而秦用以亡自是

而後其流風末俗浸淫演漫於天下者千有餘年於今其間雖有願治之君善輔之臣凡所建立皆因仍苟簡以爲當世之計率不越數百年法弊禁弛則又往往至於大壞極亂不可救過若秦之專然漢唐以來暨可觀已當其壞亂之際雖學士大夫猶或不識義理之正况世俗之凡民乎其喜浮而惡質非古而是今無足異也惟其理亂興廢之由恒在於是而未有深慮遠圖而振之者豈其沉酗沒溺之久而終不可爲邪無豪傑特起之士而不能變化鼓舞作興之也所謂豪傑特起之士者必能窮天下之理通天下之情識天下之變而其於道也知之明信之篤行之果而不惑於流俗者也今侯以高明之資當天下壞亂之時躬行古道不顧流俗之是非因取其所常被毀者以自名而見其意及遭逢

聖朝起而從政又能不以窮達易節而勤勤然欲托於文字惟恐其弗及如此豈非篤於自信而庶幾其人者與然則變化鼓舞而作興天下之民固其志之所存矣孔子曰斯民也三代之所以直道而行也謂其不可興起者不知道者也謂侯之志不在於是者不知人者也故述而記之以俟知道與知侯者考焉

獨善山房記

古之學者爲己而已及其至也則思惟其有諸己者以及乎民焉將推其有諸己者以及乎民則非得其位而施之政不可故仕而達者君子之所甚欲也非欲其仕而達也欲其有諸己者及乎民也然學而有諸己者必自貴而不徇於外故其交也有禮其進也有義必人即之而不即乎人也必世求

之而不求乎世也交之以禮矣進之以義矣人即之而世求之矣又必度其時之可爲道之可行然後起而從之是數者一或不然則三公之貴千駟之富視之猶弊屨焉曷足以動其心哉其難進寡合如此而有天下國家者方懸其爵祿以招天下之士有司者敖然持其權衡尺寸秤度而進退之幸而合其程式然後授之以職臨之以賞罰使之促促然唯上令之是聽其取士用人之法如此然而自公卿以下至於百執事之位未嘗乏人焉於是上之人自以爲其術果足以籠天下之士馭天下之才而爲天下之政矣又何必弊弊然求彼之難進寡合者爲哉蓋自三代而下山林巖穴之士懷其道德才藝深藏不售而沒齒貧賤者衆矣然其人皆浩然有以自樂未嘗或之悔也而論者以爲孟氏所謂達則兼善天

下窮則獨善其身而異端叛逆之民果於遺世者不可同日而語焉友人柯同德儒者也世居屏山之下自其祖父隱德不耀數世矣其家之所傳以爲學者皆內而弗外爲己者也而同德之爲人善論議有氣節尤能應變吾嘗與之共處憂患知其學之有守而才之足以有爲也惟其自貴而不徇於外也故不爲時之所知崎嶇連蹇至於窮且老矣終不肯少變其操而其心浩然有以自樂而無悔於是取孟氏之言名其室曰獨善山房而屬余爲文以記之余既惜其才之可用而莫用又喜其能自貴而不徇於外幾於古之學者而合乎孟氏之所云遂述其所聞以爲之記

知止齋記

錢宰

八年冬詔天下士凡寄跡佛老而有志于聖賢之學者入國

子學俾習知天理民彝然後授之政焉余助教庠舍間因獲
與諸茂異交間過尊經閣訪黃君伯厚于東叙伯厚扁其齋
居曰知止噫伯厚逃佛而歸于儒不半載而知所止矣何其
化之速邪今朝廷武功旣成誕脩文教示之以綱常道之以
道德化之以禮樂禁之以刑政將使天下之士皆知堯舜禹
湯文武周公孔子之道將使天下之民皆波堯舜禹湯文武
周公孔子之化以世之學佛者者往往多聰明識道理俾務
于學去其虛而實踐變其寂而有爲黜其偏而歸于中正猶
反手耳然而堯舜禹湯文武周公孔子以大中至正之道化
天下後世俾脩諸身措諸事業莫不各有所止之地也是故
冠尔以章甫使知首之所止焉衣尔以逢掖使知身之所止
焉正尔以夫婦復尔以父子明尔以君臣使知心之所止焉

伯厚於是乎玄冠綦纓俯仰後先以正其容貌以齊其顏色
垂紳委佩周旋抑揚以敬其儀刑以慎其進趨入其室則夫
夫婦婦怡然乎其和樂而有別也陞其堂則父子子儂然
乎其慈孝而有親也出而仕于朝則君君臣臣秩然乎其明
良之際會而有義也伯厚方且見之躬行矣其視前日祝髮
毀形滅性離倫違世獨立而高出物外者夫豈伯厚之所止
邪嗟夫北辰之止于天也不偏也流水之止于海也不息也
心猶辰也靜而不偏則所止者正矣心猶水也動而不息則
所止者至矣伯厚尚無惑於偏無怠以息庶幾終始慎其所
止哉

新建耐牢坡石閘記

大明受命

劉大昕

皇帝卽位之元年詔遣大將軍信國公鄂國公總率羽林諸
衛師旅億萬戰艦百千定山東平幽冀兵不血刃而梁晉關
陝大小郡邑悉皆附順分兵戍以守扼塞浚河梁以逸遭度
舳艫千里魚貫蟬聯貢賦供需有程無阻後以黃河變易濟
寧之南陽西暨周村涯於室壅數壞舟楫迺遵師莊石佛諸
閘北沂汶濟以達燕冀西循曹鄆以抵梁晉濟寧州城西二
十里許耐牢坡口者實西北分路之會坡有堤綿數十里以
防河決於是時遂開通焉倘失啓閉水勢散泄漕度愆期深
爲職守憂洪武二年申請于山東行省注官分任其事南疏
北導靡所寧處冬十一月省檄下委大昕相宜置閘以爲歲
久計十二月朔同寅知府余芳通判胡處謙集議率任城簿
周允暨提領郭祥至於河上視其舊口則土崩流悍不可卽

功行視口之北幾一里許平衍水匯可立基焉乃伐石轉木
度工改作時冰凍暫止三年二月二日集衆材合役下夷土
堤平水澤八尺以爲基樹以棗栗密如星布實以瓦甃迥若
砥平然後鋪張木枋數嵌石板爰琢爰斲犬牙相入復固以
灰膠關以鐵錠磨龍君剗混然天成閘門東西廣十六尺有
五寸崇十尺一寸西北比東西廣加二尺焉閘之北東向有
壩縱二十二尺西向壩縱一十五尺有奇閘之南稱是翼如
也所以捍水之洄湫衝薄也兩門之中鑿渠五寸下貫萬年
枋以立懸板復於閘之南北決去壅土以殺悍湍且濟舟以
轉折入閘自茲啓閉有常舟行如素三月二十日告成訖
功計興工至休役凡五十日以工計石工二十九人木工四
人金工二人徒四百五十人以材計木一千三百有三枋五

十甕大小七百八十有四鐵錠一百每錠斤重六斤四兩鐵
斤重二百五十五木炭斤重一千五百四十二石灰斤重六
千三百四十四工之食粟八石零七升若鐵粟則取給於官
餘悉因沂兗二州任城滕鄆諸縣土地所有規措給用雖少
勞於民而民樂於趨事不費於官而官亦易以成功此大較
也夫所雖董是役而主簿周允晨夕陳力勤敏不怠其功其
勞不可蓋也遂具載本末于石以垂永久焉

蜀山書舍記

高啓

蜀山書舍者友人徐君幼文肄學之所也幼文嘗自吳興以
書抵予曰吾山在城東若干里吾屋在山若干楹吾書在屋
若干卷山雖小而甚美屋雖朴而麗完書雖不多而足以備
閱吾將於是卒業焉予幸爲我記之子惟古之君子所取以

成其學者無常物所居以致其學者無常地也故弁裳之於
容珩瑀之於步豆澶之於陳琴瑟之於樂弓矢車馬之於服
度量權衡之於用凡於物皆學也豈專於六籍之內哉往于
田入于市處于戶庭覽于山川立于宗廟朝廷遊于庠序軍
旅凡履之地皆學也豈限於一室之間哉後世講學之道旣
廢而人之不能然也有志者殆各占山水之勝築廬聚書而
讀之雖其所以學之者異乎古然凡事物之理與夫羣聖賢
修己治人之要實皆不出於書况安僻阻之區絕紛囂之役
得一肆其力於是則其至於成就豈不反有易者哉今幼文
以方壯之齒有可用之材而不急進取益務於學以求其所
未至豈非有志之士哉而予也北郭之野有土東里之第有
書皆先人之遺也遭時多艱菲穢於榛蕪殘壞於塵蠹偃偃

馬日事奔走而不知返則其荒陋宜有愧於幼文矣尚能為是託乎然而書此而不辭者蓋姑復幼文之請亦因以自厲馬

松陽縣學復射圍記

蘇伯衡

松陽之有學學之有射圍蓋自宋紹興始元之制凡民不得持弓矢故射息而圍亦廢豪右因侵而有之踰八十年有司漫不加省

皇帝即位之明年

詔郡縣皆興學置師弟子員而講習于

六藝儒生葉端等作而言曰今學令射居其一射圍之復維其時矣以告令王君會王君徽赴

京師事格不行而提刑

按察僉事張公行縣適至乃復以告公為按圖籍凡學之地侵于民者責丞李君仙薄劉君文彬悉復之而地卒以歸正

其疆界表其畛域樹垣以繚之王君歸自京師謂部使者

祇承德意返故地於久攘之後幸惠斯文甚厚宜有以示後

人教諭毛君輝膺薦而起遂命之來謁文書曰侯以明之此舜之學政也其人之賢不賢觀其射之中不中見焉故以射

致眾眾致而後論士是以三代率由之而孔子射於矍相之圃觀者如堵使弟子揚觶而致點者三則僅有存者夫學政

莫大於射也尚矣國家方修文教而稽古定制焉則射圃之復其豈細故哉乃為之記曰復地以尺計之直學之東南

則從七十衡五十直東北則盈其從二之一去其衡三之一

直西北則其從倍東北之三其衡不及東南之八直西南則其從得東南之衡而去其一以為其衡東南故所謂射圃也

張公名志德字其陝西人王君名彞字秉文北平人輝邑人

攝學事殆一紀士論多之云

川上書堂記

金君自明家平陽之南郭其居第在濠之濬不踰閭而川流可挹也自明隱居教授間以臨以觀而心有契焉因以川上名其書堂而求余記之嗟夫昔者聖人之在川上所爲歎夫水者不在水也在乎道也而余於道猶望洋焉則自明之所以名堂者余安能言之雖然道固未易窺也而川上之流水則有足徵者矣一日有旦有中有一有夜而水之流也自旦至夜未嘗息焉一月有朔有弦有望有晦而水之流也自朔至晦未嘗息焉一歲有春有夏有秋有冬而水之流也自春至冬未嘗息焉非特歲月日然也流乎千萬年之先而不見其始焉流乎千萬年之後而不見其終焉豈獨水哉於是觀

諸日月西者沒而東者生於是觀諸陰陽上者剝而下者復於是觀諸草木榮者悴而區者申於是觀諸鳥獸孳者革而莠者穉亦猶水之前者逝而後者續也嗟乎何以然乎曰出於氣乎氣不自神也曰出於機乎機不自運也則何以然乎詎不聞乎維天之命於穆不已此天之所爲天也天命不已故命于天而形於兩間者亦不已微之爲草木鳥獸且猶然而况於人乎人之於天也其氣同也其理同也天地之初有理斯有氣有氣斯有形氣宰乎形理宰乎氣是故天地以氣爲橐籥焉以理爲樞紐焉而人之所以爲橐籥爲樞紐者亦惟氣惟理焉爾氣之在人也榮衛之周流呼吸之出入無不同乎天也而况於理乎理者何性而已矣性之在人也無往不體無時不然者何誠而已矣故曰誠者天之道也夫惟

聖人克誠安得人人而聖哉古之君子不睹亦戒不聞亦慎發乎已之所自知行乎人之所不見亦謹焉者所以立其誠而全在我之天也獨之不謹則有時而息矣有時而息則誠之不至矣誠之不至則無以與天一矣而人也曾水之不如矣嗟夫有志於道者可不謹乎哉由君子之學進于聖賢之道余未之能焉抑不敢不勉也竊喜自明之有志輒相與言之倘有取於是則請以爲川士書堂記

節義堂記

處州衛知事魏君以節義名其堂使來請曰自吾有堂堂有斯名亦已久矣然未有發其義爲吾記之者敢屬筆焉余聞魏君家梁溪梁溪於毘陵爲勝地九龍之山天下第二泉在焉魏君作堂其間不以觀遊爲美而以節義自脩亦可以見

其志矣乃記之曰節義之立不立豈惟君子鄙夫所由判國家治亂安危亦恒由之何以知其然也士之出于三代之際者養之有學校淑之有教化莫不篤於道周於德有過人之節取予辭受出處必以其義得失利害禍福不動其心殺之可也辱之可也飢之可也寒之可也爵之以五等之國富之以萬鍾之粟臨之以三軍之威使易其所守而胥爲不善不可也夫如是故可以共逸樂而亦可與同患難三代之所以長治久安其豈不由此也歟厥後惟東漢諸君子無愧焉自元興以降宦寺專政挾天子威權以薰灼海內紀綱於是大壞矣而當時君子其在位者則抗志羣小之間不少屈意以迎合附麗至於羅織鉤黨之獄起而其節操愈堅其在野者則聞風慕義慷慨奮激棄家族骨肉相勉趨死而不悔夫如

是故終漢之世不軌之徒懷篡奪者後先相望皆忌憚而不敢直遂而漢之社稷危而不遂亡者寔賴之也然則節義之所係宣細也哉近世學校不脩教化不行士鮮不為習俗所移放其邪心役於外物區區貴富何足為輕重而求之者墮名節捐禮義不顧性命而惟恐不得僥倖得之媿媿以為容詹詹以為悅汲汲保身固位以為務平居莫肯直道以事上緩急遂至鬻國而叛君若是者雖曰累千百何益於人國家哉

聖天子知節義與國家相與有無創業之初庶事未遑而獨於前朝仗節蹈義之臣或優以體貌或寵以褒贈或列諸秩祀或錄其子孫以示風厲丕變爾來垂兩紀矣雖朝廷清明四方無虞士大夫幸而享富貴之樂不踐患難之

途無由以奇節高義自見而豈可不力也哉忘其勢而取舍不悖忘人之勢而特立不懼招之不來而麾之不去斯何莫非節義也豈必見危授命殺身成仁而後為節為義哉故觀魏君之名堂非所謂有志者乎雖然人之所持以幹旋萬變者氣而已有以養之則細入芒忽而不為歎大塞天地而不為盈不以困抑摧挫而亡不以安富尊榮而存蓋有以為氣之主也故隨其所遇而皆安投其鄉而如意衆人之於是氣也無物為之主而反聽命焉如喪將之兵如朝霧之氣如暴雷迅雨之涌水其始也非不可畏而可悅假之斯須之時則已潰散消涸而不見其迹矣未有處大事臨大節而不顛倒失措者由其為氣所使而莫為之主故也均之是氣也有所養者為正氣無所養者為虛氣惟氣之正者浩然剛大不變

於物持虛氣以處夫紛紜之變其不變於物乎有志於名節者苟不明道集義以養其中而惟用虛氣求有所樹立非余之所知也願與魏君勉焉

南華謫居圖記

洪武元年夏國子祭酒許先生謫韶州即唐宰相張文獻公祠以居祠在州城之北而城南有山曰南華直平祠之前其岡巒起伏草木行列朝霏夕靄不出戶域可以盡得之先生著書閒暇時時臨眺而樂焉曰使吾爲此州人奚其不可也於是南華逸人且屬龍虎山道士方壺子繪之縑素云初上行幸金華訪求文懿公之後得先生召之見未至而乘輿還京師驛召先生赴京師一見與語大說爲立京學命爲教授鑄印使佩之仍命入傳

皇太子及諸王已而改京學爲國子學拜博士未幾陞正四品拜祭酒出入兩宮且垂十年自稽古禮文之事至于人材之進退時政之弛張無不預議先生感奮圖報是非非無所顧忌所爲學校脩廢舉墜更規設法以教養者數十事無不施行其見知於

上者至矣然亦不勝夫人之媚嫉也會先生嘗以學官什器用之私室言路因以移用官物坐之章入

上覽之而咲而媒孽先生者不已於是韶州之命行矣夫以文學侍從之賢一旦以微言而遠謫嶺海間去親戚而伍夷獠人將不勝其戚戚先生不惟不戚戚且安而樂焉觀其自號有終焉之志此其學問之過人爲何如蓋君子求在我者而已矣使其中有所愧何往而能安使其中無所愧何往而

不安是以吾祖文忠公之安置惠州自言譬如元是惠州秀才累舉不第北歸之望已絕方自肆於山水之間惟日不足何曾以謫爲意也今先生之志豈不猶之吾祖哉不然蠻邦窮裔連山複壁蛇蟲之所潛瘴癘之所聚此羈人遷客所以悲思無聊而不勝者又何足樂也余故著先生出處之故覽斯圖者得心焉

樓雲軒記

汪仲魯

自子再來郡城馬生良德稱輒謁予于城東新構之軒病卧若素安焉生請軒名應曰樓雲生又請記則又應曰吾老且病忘乎軒矣奚記焉雖然病者吾身也身吾身者初未病也且吾胡爲而來也又胡爲而止也亦嘗觀諸雲乎何思何爲浮游太虛薄日月而翳光景雨下土而澤萬物迨其歸而棲

也倏焉歛藏不見蹤跡孰使然哉靜無而動有者也今生道遙乎人世隨隙地而構斯軒因阜環列靜安有常澗泉細流清冷自在與人若相得也吾之來而由乎是而止乎是與生夙相契也雲乎天遊人乎雲卧吾何知也吾何爲也而亦無不知且爲也况吾與生是非利害相忘久矣靡存於中靡形於外而又奚記焉德稱默識吾言命其友書于軒中以爲記

